

କରନ୍ତୀୟମାନଙ୍କ ମଣ୍ଡଳି ନିକଟକୁ ପାଉଲଙ୍କ ଦ୍ଵିତୀୟ ପତ୍ର କରିନ୍ଥୀୟ ମଣ୍ଡଳି ଲାକ୍ତୁ ପାଉଲତି ମାରିଉନ୍ତ୍ରୁ ଆକୁ କରିନ୍ଥୀୟ ଆକୁ ବିସୟତାନ୍ ଏସ ମାଟା

୨ କରିନ୍ଥୀୟ ପେରିଡ଼ ପାଉଲତି ମାଣାନ୍ ଆନାତସୁଗି ଜିସୁ କ୍ରିସ୍ତଦି ଜନମତି ପୁରା ୫୫-୫୬ ବାର୍ଷେକ୍ ଖେନକା ରାସାତା ମାର୍ହାତ୍ ୧:୧ । ମା ଲାକ୍ତୁ ମାନି କରିନ୍ଥୀୟ ମଣ୍ଡଳିଦିଙ୍ଗ୍ ରାସାତିମାନି ଆକୁ ଲୋଇ ଇକା ଆଜିନାତ୍ ପାଉଲତି ମାରିଉନ୍ତ୍ରୁ ଆକୁ । ପଣ୍ଡିତକୁ ବିସବାସ୍ କିନାର୍ ଜେ, ଇୟା ଆଗ୍ଡିରାନ୍ ପାଉଲ କରିନ୍ଥୀୟ ମଣ୍ଡଳି ଲାକ୍ତୁ ଉନ୍ତ୍ରୁ ଆବ୍ଝାଦି ସିଟି ରାସତାମାର୍ହାନ୍ ୨:୩-୪ପଦଦୁ ଖାନ୍ ଆମାକା ଖେରନାନ୍, ଆବେଶି ଇନି ରାସାତି ବିସୟ ମା ଲାକ୍ତୁ ସିଲେଡ଼ । ଆନାତସୁଗି ପାଉଲ ମାକିଦନିଆରେ ମାନି ବେଡ଼ାଦୁ ୨ କରିନ୍ଥୀୟ ରାସାତାମାର୍ହାନ୍ ୨:୧୩ ।

୨ କରିନ୍ଥୀୟ ଆଜିନାତ୍ ମାରିଉନ୍ତ୍ରୁ ଇକା, ଆକା ପୁରା ନିଜେଦିକା ମାରି ଖେଡ଼ିକା ଇକା । କରିନ୍ଥୀୟଦୁ ମାନି ମଣ୍ଡଳି ବିସୟତାନ୍ ତିତସଦି ମାଣାନ୍ ନେଗି କାବୁର ପୟଜି ପାଉଲ ଖେଡ଼ିକା ଆନାନ୍ । ଇୟା ସିଟିଦୁ ପୁନି ନିୟମତି ଇସାବ୍ତାତି ବିସୟ ସିକିୟା ପୟନାପ୍ । ଇୟା ବାଗ୍ତୁ, ଆମାମାନୁ ପାଉଲ ଜିରୁସାଲାମ୍ତି ବିସବାସ୍‌ସିରିଙ୍ଗ୍ ସାହାଜ୍ୟ କିନି ଉଣ୍ଡିଙ୍ଗ୍ ଡାବୁଙ୍ଗ୍ ଲିସ୍‌ତେଙ୍ଗ୍ ଆଦେସ୍ ସିନାନ୍ ୮-୯ । ଇକା ଜାଣେଆଜିନାତ୍ ଜେ, ମଣ୍ଡଳି ଆତେରଦାନ୍ ଏସ ମିର୍ ଖେରନି ପ୍ରେରିତର୍, ଖାର ନିଜେଦିଙ୍ଗ୍ ପଦ୍ ମୁସକୁ କିଦେଙ୍ଗ୍ ପାଉଲତି ବିରୁଦ୍‌ତାନ୍ ମଣ୍ଡଳିଦି ଏସ ଲୋକାଙ୍ଗ୍ ବ୍ୟବହାର୍ କିଜିନାର୍ । ଖାର୍ ପାଉଲତି ଅଦିକାର୍‌ତିଙ୍ଗ୍ ନାମ୍‌ଏଜିନାର୍ । ଆମା ବାଦ୍‌ଲୁ ୨ କରିନ୍ଥୀୟ ସାରାସାରି ବାଗ୍ତୁ ଖାନ୍ ଅରେନ୍ ଜିସୁ କ୍ରିସ୍ତଦି ଅଦିକାର୍‌ତାନ୍ ଅରେନ୍

ପ୍ରେରିତ ଆନାନ୍ ଇତି ତାତ୍ତ୍ବତାନ୍ ପାରମାଣ୍ କିନାର୍ ।

ଇୟା ଆକୁତୁ ମାନି ଏସ ମୁକ୍ତିସ ବିସୟ

୧. ପାଉଲ ଆକୁତି ଆରାମତାନ୍ ନମସ୍କାର ଜାଣେକିନାନ୍ । ୧:୧-୭

୨. ପାଉଲ ଖାନି ସନ୍ତେଜ୍ ତିଆରତାନ୍ ବାଦେଲ୍ ଆନିକା ମାରି ଖାରି ବିସୟତାନ୍ ପୟତିମାନି ମାଟା ମାରି ଖାନି ଆକୁ ବିସୟତାନ୍ ଖାରି ମାଟା । ୧:୮-୭:୧୭

୩. ପାଉଲ ଜିରୁସାଲମ୍ତି ବିସ୍ବାସିରି ଉଣ୍ଡିଙ୍ ଦାନ୍ ଲସ୍ବି ବିସୟତାନ୍ ଆଦେସ୍ ସିନାନ୍ । ୮:୧-୯:୧୫

୪. ସାରାସାରିଖେନକା ପାଉଲ ଖାନି ପ୍ରେରିତ ପଦ୍ ସୁରକ୍ଷା କିନାନ୍ ମାରି ପୁନାଦାନ୍ ସନି ଉଣ୍ଡିଙ୍ ଜାଗାରତା ଖେରନାନ୍ । ୧୦:୧-୧୩:୧୪

୧ ☆ ନାନ୍ ପାଉଲ, ମାପୁରୁଦି ବଦାଦାନ୍ ବାସେଆତି ଜିସୁ କ୍ରିସ୍ତିଦି ପ୍ରେରିତ ସିସୁ ପାଉଲ ମାରି ମା ତଡାନ୍ ତିମତି କରନ୍ତି ଗାଡାଦି ମାପୁରୁଦି ମଣ୍ଡଲି ମାରି ଆକାୟା ଦେସ୍ତି ଓଜୁ ବିସ୍ବାସିରି ଲାକୁତୁ ଇୟା ଆକୁ ରାସ୍ବିନାନ୍ ।

୨ ମା ବୁବା ମାପୁରୁ ମାରି ପ୍ରବୁ ଜିସୁ କ୍ରିସ୍ତି ମିଙ୍ଗ୍ ଦୟା ମାରି ସାନ୍ତି ସିପିନ୍ ।

ମାପୁରୁଦି ଉଣ୍ଡିଙ୍ ପାଉଲ୍ତି ଦନ୍ୟବାଦ

୩ ରାଦୁ, ମା ମାପୁରୁ ଜିସୁ କ୍ରିସ୍ତିଦି ବୁବା, ଦୟାକିନିକାନ୍ ମାରି ଓଜେରିଙ୍ ସାକାକିନିକାନ୍, ମାପୁରୁଙ୍ଗୁ ଦନ୍ୟବାଦ୍ ଜାଣେକିନାଟ୍ ।

୪ ମା ଦୁକ୍ କାସ୍ଟୁ ବେଡାଦୁ ଖାନ୍ ମାଙ୍ଗ୍ ଏମେ ସାନ୍ତି ସିନାନ୍, ଆୟା ସାନ୍ତି ଦାନ୍ ମାଡୁ ଦୁଃକ୍ କାଷ୍ଟୁ ପୟତିମାନି ଆଇଖାରିଙ୍ ସାନ୍ତି ସିଦେଙ୍ ଆଟିନିକା ।

୫ ମାଡୁ କ୍ରିସ୍ତିଦି ନାଣ୍ଟ ଦୁକ୍ ବୋଗଦୁ ମିସାତିମାନିଙ୍ କ୍ରିସ୍ତିଦି ସାକାଦାନ୍ ମାପୁରୁଦି ନାଣ୍ଟସାନ୍ତିଦୁ ବା ମିସାଦେଙ୍ ଆଟିନିକା ।

୬ ମାଡୁ ଜଦି ଏମେ ଦୁଃକ୍ ବୋଗ୍ କିନିକା, ଆକା ମି ନେଗିତାନିଙ୍ ମାରି ରକ୍ତୟାଦି ଉଣ୍ଡିଙ୍ । ମାପୁ ସାନ୍ତିପୋୟତିଙ୍, ମିର ବା ଆୟାଞ୍ଜା ଆରୁଞ୍ଜାଦାନ୍ ଦୁକ୍ ବୋଗକିନି ଉଣ୍ଡିଙ୍ ସାନ୍ତି ମାରି ସାନ୍ତି ପୟନିଦେର୍ ।

୭ ମି ବିଷୟତାନ୍ ମା ଆସା ମାନାତ୍ । ମାପୁ ନେସ୍ନାପ୍, ମିର୍ ମା ଦୁକ୍କାଷ୍ଟୁ ଏଣ୍ଡେସ୍ ମିସାଜିନିଦେର୍, ଆୟାଞ୍ଜା ମା ସାନ୍ତିଦୁ ବା ମିସାଦୁ ।

୮ ✱ତଡ଼ାନ୍କୁ ନି ତାଙ୍ଗି, ମାଡ଼ୁ ଆସିଆ ଦେସ୍ତୁ ପୋଇତିମାନି କାସ୍ତୁ ବିଷୟ ମିଙ୍ଗି ଷ୍ଟେର୍ତେଙ୍ଗି ଇଛାକିଜିନା । ଆୟାକାସ୍ତୁ ବଜୁଆଜିମାନିଙ୍ଗି ମା ଜିବନ୍ତୁ ସାନ୍ତି ଆସା ଡିସ୍ତାମାରାପ୍ ।

୯ ମାଙ୍ଗି ବିଚାର୍ ସିଆତାମାନାତ୍ ଇଜି ଅଡ଼ବିତାମାରାପ୍ । ମାତର ନିଜେ ମୁସୁକୁ ଆସାଇଡ଼ଏନ୍ଙା ସାନିମାଡ଼ାନ୍କୁ ଜିବନ୍ ସିନି ମାପୁରୁଦି ମୁସୁକୁ ଆସା ଇତିନି ଉଣ୍ଡିଙ୍ଗି ଇୟାଞ୍ଜି ଗୋଟାତା ମାନାତ୍ ।

୧୦ ଇୟାଞ୍ଜା ନାଣ୍ଡସାନି ବିପଦତାନ୍ ଝାନ୍ ମାଙ୍ଗି ଉଦାର୍ କିତାମାନାନ୍ ମାରି କିଜିମାନାନ୍ । ଝାନ୍ ମାରିଡେସି ମାଙ୍ଗି ଜାଗ୍ରାତା କିନାନ୍ ଇୟା ଆସା ମାଙ୍ଗି ଝାନିମାନୁ ମାନାତ୍ ।

୧୧ ମିର୍ ପାରତନାଦାନ୍ ମାଙ୍ଗି ସାହାଜ୍ୟ କିଦୁ । ଆର୍ଡିଙ୍ଗି, ମା ଉଣ୍ଡିଙ୍ଗି କିତିମାନି ଏସ ପାରତନାଦୁ ଉତର୍ ପୋଇନିକା ମାରି ମାପୁରୁ ମାଙ୍ଗି ଆସିର୍ବାଦ୍ ଦାନ୍ କିନାନ୍ । ମା ଉଣ୍ଡିଙ୍ଗି ଗାଦିଲୋକ୍ ମାପୁରୁମାଡ଼ାନ୍ ଦନ୍ୟବାଦ ସିନାର୍ ।

ପାଉଲତି ଜଜନାଦି ବାଦ୍‌ଲେଆନିକା

୧୨ ଦୁନିଆଦୁ ଜିବନ୍ ମାରି ବିସେସ୍‌କିଜି ମିଞ୍ଜାଲେ ମା ମିଲାନିସା ମାପୁରୁମାନୁ ପବିତ୍ର ମାରି ବିସ୍‌ବାସ୍ ବୁଲ୍‌ଜିସାଜି ଇଜି ମା ବୁଦିଦୁ ସାକି । ଇୟାଉଣ୍ଡିଙ୍ଗି ମା ମୋନଡୁ ଗର୍ବ ଆଜିନାତ୍ ଦୁନିଆଦି ବୁଦିଦାନ୍ ଆଏଡେ, ମାତର୍ ମାପୁରୁଦି ଦୟାଦାନ୍ ଇକା କିଦେଙ୍ଗି ମାପୁ ସାକି ଆତିମାନିକା ।

୧୩ ଆମାକା ପଡ଼ାଜି ମିର୍ ବୁଜାଜିନିଦେର୍, ମିମାନୁ ମାପ୍ ନାସନେ ରାସ୍ତାମାନାପ୍ ।

୧୪ ନାନୁ ଆସା କିଜିନା, ଇଲେଇ ଆମାକା ଅଡ଼ପ୍‌ତାନ୍ ବାବେ ବୁଜାଜିନାପ୍, ଆକା ଅଡ଼ପ୍‌ତାନ୍ ବାବରେ ପ୍ରବୁ ଜିସୁଦି ଡେସିଞ୍ଜାନି ଝାନିକା ପୁରା ବୁଜାଦେଙ୍ଗି ଆଟ୍‌ନାର୍ । ଆର୍ଡିଙ୍ଗି, ମିର୍ ମା ଉଣ୍ଡିଙ୍ଗି ଗର୍ବ କିଜିନିଦେର୍ ମାରି ମାପୁ ବା ମି ଉଣ୍ଡିଙ୍ଗି ଗର୍ବ କିଜିନାପ୍ ।

୧୫ ଇୟା ବିସୟତାନ୍ ନାନୁ ଚିକ୍‌ବାବେ ନେସ୍ତିମାନିଙ୍ଗ ଆଗିଡିନେ ମି ଲାକ୍‌ତୁନେ ସନି ଉଣ୍ଡିଙ୍ଗ ନା ବଦା ମାର୍‌ଆଡ଼ । ଆର୍‌ତିଙ୍ଗ ମିର୍ ରିଜା ସୁଡ଼ୁ ନାଙ୍ଗ ଦୟା ପୟ୍‌ଦେଙ୍ଗ ଆର୍‌ତିଦେର୍‌ମାନ୍ତି ।

୧୬ ☆ମାସିଦନିଆ ସନିଝାଲେ ମାରି ଆବେଟ୍‌କୁ ଡେସିଝାନିଝାଲେ ମି ଲାକ୍‌ତୁ ଏସ ଦିନ୍ ମାନଡେଙ୍ଗ ନା ପାଣିକିନିକା ମାର୍‌ଆଡ଼, ମାତର୍ ଜିହୁଦା ଦେସ୍‌ତୁ ସନିଉଣ୍ଡିଙ୍ଗ ନାନୁ ମି ସାହାଜ୍ୟ ଦରକାର ମାର୍‌ଆଡ଼ ।

୧୭ ନାନୁ ଇନିକା ନା ବଦାଦାନ୍ ଇୟା ପାଣି ତିଆର କିତାମାର୍‌ଆ ? ଏମେକାର ଅରସେ “ହୁଁ, ହୁଁ” ମାରି “ସିଲେ, ସିଲେ,” ଇନାର, ଝାରିଝାଜା ଇନିକା ନା ନିଜେଦି ତରାନିଉଣ୍ଡିଙ୍ଗ ନା ପାଣିକିନିକା ?

୧୮ ସଡ଼ ମାପୁରୁ ନେସ୍‌ନାନ୍, ଅବସ୍ୟ ମାପୁରୁ ମି ମାଟା ଝେରନିଝାଲେ ମାପ୍ ଏସକାଙ୍ଗବା “ହୁଁ ସିଲ୍‌ତିଙ୍ଗ ସିଲେ ।”

୧୯ ସିଲା, ତିମତି ମାରି ନାମାଣୁକୁ ମି ଲାକ୍‌ତୁ ପ୍ରଚାରକିତିମାନି ମାପୁରୁଦି କଡ଼ ଜିସୁ କ୍ରିସ୍‌ଟଙ୍ଗ, ଏସକାଙ୍ଗ ଅରସେ “ହୁଁ” ମାରି “ସିଲେ” ଇନ୍‌ଏର୍ । ଆଇତରିନ୍, ଝାନ୍ ଝିଜୁଦିନ୍ ମାପୁରୁଦି ମାଟାଦିଙ୍ଗ “ହୁଁ” ଇଜିନାନ୍ ।

୨୦ ମାପୁରୁଦି ଝିଜୁ ଆସାଦି ଉଣ୍ଡିଙ୍ଗ ଜିସୁ କ୍ରିସ୍‌ “ହୁଁ,” ଇନାନ୍ ଝାନିମାନୁ ପୁରା ଆତାମାନାଡ଼ । ଇୟାଉଣ୍ଡିଙ୍ଗ ଜିସୁ କ୍ରିସ୍‌ଦି ଉଣ୍ଡିଙ୍ଗ ମା ମାପୁରୁଦି ଗୌରବ ଉଣ୍ଡିଙ୍ଗ “ଆମେନ୍ ।”

୨୧ ନିଜେ ମାପୁରୁ ଜିସୁ କ୍ରିସ୍‌ଦିମାନୁ ମିଦି ମାରି ମା ଜିବନ୍‌ଡିଙ୍ଗ ଅରସେ କିଜି ରକ୍‌ୟା କିତାମାନାନ୍ ।

୨୨ ଝାନ୍ ମାଙ୍ଗ ଝେରେଏ କିତାମାନାନ୍ ମାରି ମା ଜିବନ୍‌ତୁ ଝାନି ପବିତ୍ରଆମ୍‌ାଦିଙ୍ଗ ଇତିତାମାନାନ୍ । ପବିତ୍ରଆମ୍‌ା ଆଜିନାଡ଼, ମା ମୁସ୍‌କୁ ମାପୁରୁଦି ଅଦିକାରତି ସିନା ମାରି ବବିସଡ଼ୁ ମାଡୁ ଆମାକା ପୟ୍‌ନିକା, ଝାନି ଝିଜୁ ଝାଜା ।

୨୩ ମାପୁରୁ ନା ସାକି । ଝାନ୍ ନା ଜିବନ୍ ନେସ୍‌ନାନ୍ । ମିଙ୍ଗ ନାନୁ ଏଣ୍ଡେସ୍‌ମାରି ଦୁଃକ୍‌ସିଏ, ଆୟାଉଣ୍ଡିଙ୍ଗ ନାନ୍ କରନ୍ତିଦୁ ସନିକା ତେବାକିତା ।

୨୪ ମିର୍ ଏମେ ବାସା ବିସ୍‌ବାସ୍ କିନିଦେର୍, ଇୟା ବିସୟତାନ୍ ମି ମୁସ୍‌କୁ ପାଣିକିଦେଙ୍ଗ ମାପ୍ ସେସ୍‌କିଏପ୍, ମାତର୍ ମିର୍ ବିସ୍‌ବାସ୍

ଆରୁଖା ଆଜି । ମାରି ମିଙ୍ଗୁ କେବଳ ଖେଡ଼ିକା କିନି ଉଣିଙ୍ଗ ମି ଖାଲେ
ମିସାବିଡ଼ାଜି ମାତୁ ପାଣିକିନାଟ୍ ।

୨

୧ ଜଦି ନାନ୍ ମି ଲାକ୍ତୁ ଖାନିକା ମି ଉଣିଙ୍ଗ ଦୁଃଖଆଜିନାଟ୍, ମି
ଲାକ୍ତୁ ମାରି ଏସକାଙ୍ଗ ବା ଖାଦେଙ୍ଗ ନାନ୍ ବଦାକିଏ ।

୨ ମିଙ୍ଗୁ ଦୁକ୍ ସିତିଙ୍ଗ, ନାଙ୍ଗୁ ଏନ୍ ଖେଡ଼ିକା ସିନାନ୍ ? ମିଙ୍ଗୁ
ଡିସ୍ତିଙ୍ଗ ମାରି ଆୟାଖାଜା ଏନ୍ ସିଲେର୍ ।

୩ ଆୟାଉଣିଙ୍ଗ ନାନ୍ ମିଙ୍ଗୁ ରାସ୍ତାମାରୁଆ, ନାନ୍ ଆବେନ୍
ସରିଙ୍ଗ; ଏମେଖାରି ଉଣିଙ୍ଗ ନା ଖେଡ଼ିକା ଆତାଡ଼ମାନ୍ତି, ଖାରିମାତାନ୍ତକୁ
ଏଣ୍ଡେସ ନାନ୍ ଦୁକ୍ ପୟଏ । ସଡ଼ତାନ୍ ନା ତାଟ୍ ବିସ୍ବାସ୍ ଜେ, ନା
ଖେଡ଼ିକାଦୁ ମି ଖେଡ଼ିକା ।

୪ ନାଣ୍ଟ ଦୁକ୍ ନି କାସ୍ତୁଦାନ୍ ଜିବନ୍ତାନ୍ ଆଡ଼ବାଜି ଆଡ଼ବାଜି
ନାନ୍ ଏମେ ସିଟି ରାସ୍ତାମାରୁଆ, ମିଙ୍ଗୁ ଦୁକ୍ ସିଦେଙ୍ଗ ସିଲେ,
ମାତର ମିଙ୍ଗୁ ନାନ୍ ଏସଜିବନ୍ନୋନା, ଇକା ଖେରନିକା ମାରାଟ୍
ଆୟାଟିଟିଦି ଆଦେସ୍ ।

ଦସି ଲୋକ୍ତି କେମା

୫ ଜଦି ଏନ୍ ଏମେଖାନିଙ୍ଗ ଦୁକ୍ ସିନାନ୍, ଖାନ୍ ନେ ନା ମୋନ୍ତୁ ଦୁକ୍
ସିଏନ୍, ଏସ ନାଣ୍ଟ ମିଙ୍ଗୁ ବା ଦୁକ୍ ସିଜିନା । ଇୟା ବିସୟତାନ୍ ନାନ୍
ନାଣ୍ଟ ବୋଜୁ ସିନିଉଣିଙ୍ଗ ମିଙ୍ଗୁ ବଦାକିଏଜିନା ।

୬ ମି ମାତାନ୍ତକୁ ଏସଲୋକ୍ ବଦାଦାନ୍ ଆୟା ଲୋକ୍ତିଙ୍ଗ ଆମା
ଦଣ୍ଡସିତାମାନାର୍, ଆକା ଖାନି ଉଣିଙ୍ଗ ବେସି ।

୭ ଖାନ୍ ଏଣ୍ଡେସ ନାଣ୍ଟ ଦୁକ୍ତାନ୍ ଆଏନ୍, ଆୟାଉଣିଙ୍ଗ ଇଲେଇ
ଖାନିଙ୍ଗ କେମା ମାରି ସାନ୍ତି ସିଦେଙ୍ଗ ମି ପାଣି ।

୮ ମିଙ୍ଗୁ ନା ଅନୁରଦ୍, ମିର୍ ଖାନିଙ୍ଗ ଲାଡ଼ ମାରି ଖେଡ଼ିକା
କିଜିନିଦେର୍ ଇଜି ଖେରସ୍ ସିଦାଟ୍ ।

୯ ମିର୍ ଖିଜୁଦିନ୍ ନା ମାଟା ମାନାଦେଙ୍ଗ ତିଆର୍ ନୋ ସିଲେ, ଆକା
ନେସ୍ନି ଉଣିଙ୍ଗ ନାନ୍ ଆୟା ଆକୁ ରାସ୍ତାମାରୁଆ ।

୧୦ ଜଦି ମିର୍ ଏଙ୍ଗବା କେମା କିନିଦେର, ନାନ୍ ବା ଖାନିଙ୍ଗ କେମା କିନା । ଜଦି ଇନି ବିସୟତାନ୍ ଏମେଖାନିଙ୍ଗ କେମାକିନାମାନାନ୍, ଆକା ଖାନିଙ୍ଗ କ୍ରିସ୍ତଦି ଆଗଡ଼ିରାନ୍ ମି ଉଣ୍ଡିଙ୍ଗ କିତାମାନା ।

୧୧ ଆରତିଙ୍ଗ ସୟତାନ୍ ମା ବିରୁଦ୍ଧତାନ୍ ଇନି ପାଣି କିନି ଉଣ୍ଡିଙ୍ଗ ସୁଜୋଗ ପୟଏଡ଼; ତାନି ଝିଜୁ ପାଣି ମାପ୍ ନେସ୍ନାପ୍ ।

୧୨ କ୍ରିସ୍ତଦି ସୁସମାଚାର ଝେରନି ଉଣ୍ଡିଙ୍ଗ ତ୍ରୋୟା ଦିପଦୁ ଇଜି ନାନ୍ ସୁଡ଼ଡ଼ା, ଇୟା ପାଣି ଉଣ୍ଡିଙ୍ଗ ପ୍ରବୁ ସାରି ରେତା ମାନାନ୍ ।

୧୩ ମାତର୍ ତଡ଼ାନ୍ ତିତସତିଙ୍ଗ ଆବେନ୍ ସୁଡ଼ସୁଣ୍ଡା ନାନ୍ ଦାନ୍ଦା ଆତା । ଆଦେଙ୍ଗ ଆବେଣି ଲୋକାମାଣୁକୁ ଡିସ୍ତାନୋ ନାନ୍ ମାସିଦୋନିଆଦୁ ସର୍ଥା ।

କ୍ରିସ୍ତଦି ମାଣ୍ଡୁ ଜିଣାନିକା

୧୪ ମାପୁରୁଦି ଦନ୍ୟବାଦ୍ ଆପିଡ଼ । ଇରିଙ୍ଗ ଖାନ୍ ଜିସୁ କ୍ରିସ୍ତଦିମାଣୁକୁ ଝିଜୁଦିନ୍ ମାଙ୍ଗ୍ ଜିଣାନି ସାରିଦୁ ଆଗଡ଼ି ଅନାନ୍ । ମାରି ବାସନା ଦୁପ୍ପଣି ଝିଜୁତରିନ୍ ଝେଙ୍ଗ୍ ତି ଖାଜା କ୍ରିସ୍ତଦି ବୁଦି ଆଇଖାରିଙ୍ଗ୍ ସିନିଉଣ୍ଡିଙ୍ଗ ମାପୁରୁ ମାଙ୍ଗ୍ ବ୍ୟବହାର କିତାମାନାନ୍ ।

୧୫ ଇରିଙ୍ଗ୍ ଏମେକାର ରକିୟା ପୟତାମାନାର୍ ମାରି ଏମେକାର୍ ନାସୁ ସାରିଦୁ ମୁଜିତାମାନାର୍, ଝିଜେରିମାଣୁକୁ ମାପ୍ ଆଜିନାପ୍ ମାପୁରୁଦି ଉଦେସ୍ତାନ୍ ସିଆୟ୍ ଆତିମାନି କ୍ରିସ୍ତଦି ବାସନା ଦୁପ୍ପଣି ଖାଜା ।

୧୬ ଆମାକାର୍ ସାତି ସାରିଦୁ ବୁଲାଇନାର୍; ଖାରି ଲାକ୍ତୁ ଇୟା ବାସନାନାନିକା ସାନିକା, ଆମାକାର୍ ରକିୟା ପୟତାମାନାର୍, ଖାରି ଉଣ୍ଡିଙ୍ଗ ଇକା ଜିବନ୍ମାନିବାକ୍ୟ । ମାତର୍ ଇୟା ପାଣି କିନି ଉଣ୍ଡିଙ୍ଗ୍ ଏନ୍ ଡାର୍ ।

୧୭ ଗାଦିଲୋକ୍ ନିଜେ ଲାବବାନ୍ ଆଦେଙ୍ଗ୍ ମାପୁରୁଦି ବାକ୍ୟ ବ୍ୟବହାର କିଜିନାର୍ । ମାଡ଼ୁ ମାତର୍ ଆୟାଖାଜା ସିଲେ । ମାଙ୍ଗ୍ ମାପୁରୁ ପୋକିସି କିତିମାନିଙ୍ଗ୍ ମାଡ଼ୁ ବିସ୍ବାସ୍ତାନ୍ ଖାନି ଆଦେସ୍ ମାନାଜିନି ମାରି ମାପୁରୁଦି ସାକିଦାନ୍ କ୍ରିସ୍ତଦି ଦାସ ଖାଜା ପ୍ରଚାର କିନାପ୍ ।

୩

ପୁନି ନିୟମ୍ତି ଦାସ

୧ ମାତୃ ଛନିକା ମାରି ଗର୍ବ ଖାଜା ମନେଆଜିନାତ ? ଇରିଙ୍ଗ
ଆଇଖାରିଖାଜା ମାତୃ ଛନିକା ମି ଲାକୁତୁ ବା ମି ଲାକୁତୁରାନ୍ ପରିଚୟ
ଆକୁ ଦରକାର ଛଜିନିକା ।

୨ ମିର୍ ମା ପରିଚୟ ଆକୁ, ମା ଜିବନ୍‌ଲୋଇ ପାଟାଦି ରାସାତି ସିଟି,
ଏମେତାନିଙ୍ଗ୍ ଝିଜେରେ ନେସ୍‌ନାର୍ ମାରି ପଡ଼ାଦେଙ୍ଗ୍ ଆଟ୍‌ନାର୍ ।

୩ ଇୟା ସେବା ଆକୁ କ୍ରିସ୍ତଦି ମାଡ଼ାନ୍ ରାସାତାମାନାତ୍ ମାରି
ମା ମୋନତି ଆକୁଦୁ ଲୋଇସରାମାନାତ୍ । ଇକା ସିରାଦାନ୍
ରାସାଏଡ଼, ମାତର୍ ଜିବନ୍‌ମାନି ମାପୁରୁଦି ଆମ୍ବାଦାନ୍ ଲୋକା ଜିବନ୍‌ତୁ
ରାସାତାମାନାତ୍ ।

୪ କ୍ରିସ୍ତଦି ସିଜି ମାପୁରୁଦି ମୁସୁକୁ ଆସା ମାନିଙ୍ଗ୍ ମାତୃ ଛଜିନିକା,

୫ ଇରିଙ୍ଗ୍ ମାତୃ ଛଜିମାନି ଦାବି କିନି ଉଣ୍ଡିଙ୍ଗ୍ ଇନି ଜୋଗ୍ୟ ବା
ସିଲେଡ଼ । ମା ଜୋଗ୍ୟତା ମାପୁରୁଦିମାଣୁକୁ ଖାନାତ୍ ।

୬ ପୁନି ନିୟମ୍ତି ସେବାକିନିଉଣ୍ଡିଙ୍ଗ୍ ମାପୁରୁ ମାଙ୍ଗ୍
ଆସକିତାମାନାନ୍ । ଇୟା ନିୟମ ରାସାଏଡ଼, ମାତୃ ମାପୁରୁଦି ଆମ୍ବାଦି
ଦାନ୍ ଖାତିମାନିକା, ଇରିଙ୍ଗ୍ ରାସାତି ନିୟମ୍ ସାନିକା ଗଟେକିନାତ୍,
ମାତର ଆମ୍ବାଦି ନିୟମ୍ ଜିବନ୍‌କିନାତ୍ ।

୭ ପିଡ଼୍‌ପିକାଲୁ ମୁସୁକୁ ରସାତିମାନି ମୋସାଦି ବ୍ୟବସ୍ଥାଦି ସେବା
ତିଆର୍ ବେଡ଼ାଦୁ ମାପୁରୁ ଗୌରବ୍ ତରାତା ମାର୍ହାତ୍ । ଆୟା
ଗୌରବ୍‌ତି ଦିଖା ନାମିତି ମାରିଙ୍ଗ୍‌ବା ମୋସାଦି ଜାୟ୍ ମୋକମ୍‌ତରିନ୍
ଇସ୍ରାଏଲ୍ ଲୋକୁ ସୁଡ଼ୁଦେଙ୍ଗ୍ ଆଟ୍‌ଏତାମାରାର୍ । ସାନିକା ଗଟେକିନି
ବ୍ୟବସ୍ଥା ଜଦି ଇୟାଖାଜା ଗୌରବ୍‌ତି ଖାଲେ ଝେଙ୍ଗ୍‌ତାତ୍ ।

୮ ଆର୍ତ୍ତିଙ୍ଗ୍ ପବିତ୍ରଆମ୍ବାଦି ସେବା ପାଣିଙ୍ଗ୍‌ଝିଜୁ ଖାନି ମାଡ଼ାନ୍ ଏସ
ନାଣ୍ଡ ଗୌରବ୍‌ତାନ୍ ତିଆର୍ ଆଏଡ଼ ।

୯ ଦଣ୍ଡ ସିନି ନିୟମ୍ ସେବା ପାଣି ମୋହିମାଦୁ ଜଦି ଏସ ଗୌରବ୍‌ଦୁ,
ଆର୍ତ୍ତିଙ୍ଗ୍ ପରିତ୍ରାଣ ଲୋକୁଦି ନିୟମ୍‌ତିଙ୍ଗ୍ ମାନାତିଙ୍ଗ୍ ଏସ ନାଣ୍ଡ
ଗୌରବ୍ ଆଏଡେମାନାତ୍ ।

୧୦ ମାତ୍ର ଲୁନତ୍ରେଙ୍ଗ ଆଗିନିକା, ପୁର୍ବେ ଆମାକା ଦନ୍ୟବାଦ୍ ମାରାତ୍, ଜାୟତି ଉଣ୍ଡି ମହିମାଦି ଖାତାତ୍ ଆକା ଇଲେଇ ଆକା ଖାତ୍ ସି ସରାମାନାତ୍ ।

୧୧ ଜଦି ତେବାଇ ବିସୟ ନିସ ଗୌରବ୍ ପୋଇନାତ୍, ଝିନ୍ତୁ ଦିନତି ବିସୟ ଝେନିମାତାନକୁ ଏସ ନାଣ୍ଟ ଗୁଣ୍ଟୁତାନ ଗୌରବ୍ ପୋଇନାନ !

୧୨ ଆୟା ଆସା ମାନିଙ୍ଗ୍ ମାତୁ ନାଣ୍ଟ ସାହାସ୍ ।

୧୩ ମାତ୍ର ଚୁମାସାଦି ଖାଜା ଆଇକା । ଖାନ୍ ନିଜେ ମୋକମତୁ କାବର୍ ପିଡିଗିତା ମାରାନ୍, ଏଣ୍ଡେସ୍ ନାମଜିମାନି ଆୟା ଦିଝେଙ୍ଗ୍ ଝିଜ୍ଜିନିକା ଇସ୍ତାଏଲ୍ ଲୋକୁ ସୁଡୁଦେଙ୍ଗ୍ ଆଟ୍ ଏର୍ ।

୧୪ ସତେନେ ଖାତ୍ ବୁଜାନି ସାକ୍ତି ହାରା କିତାମାନାର୍ । ଇଲେଇବା ପାଡ଼ଇ ନିୟମ୍ ପଡାନି ଖାଲେ ଖାରି ଆଗଡି ଆୟା ଓଡ଼ଣି ବ୍ୟବହାର୍ ମାନାତ୍ । ଜିସୁ କ୍ରିସ୍ତଦି ଖାଲେ ମିସାନିମାତାନ କେବଲ ଆୟାଖାନିକା ଆକ ଆନାତ୍ ।

୧୫ ନେରୁ ବା ମୋସାଦି ବ୍ୟବସ୍ଥା ପଡାନିଖାଲେ ଖାରି ମୋନ୍ ମୁସୁକୁ ମାନାତ୍ ଉଣ୍ଡି କାବର୍ ।

୧୬ ମାତ୍ର ଆୟା କାବର୍ ଗୁସାଦେଙ୍ଗ୍ ଆଟ୍ ନାତ୍ । ଇରିଙ୍ଗ୍ ଦର୍ମ ସାସ୍ତ୍ର ଇନାତ୍, ବ୍ୟବସ୍ଥାତୁ ମୋସାଦି ବିସୟତାନ ରାସାତାମାନାତ୍, ମାପୁରୁଦି ଆଗଡି ମୋକମ୍ ସୁଣିଉଣ୍ଡିଙ୍ଗ୍ ଆୟା କାବର୍ ଗୁସାତାସରାତ୍ ।

୧୭ ଇୟା ବ୍ୟବସ୍ଥାତୁ ରାସାତିକା “ପ୍ରବୁ ଆଜିନାନ୍ ଆମ୍ବା” ଏମେନୁ ପ୍ରବୁଦି ଆମ୍ବା, ଆବେନ୍ ମାନାତ୍ ମୁକୁଡାନିକା ।

୧୮ ମା ଝିଜେରି କେର୍ବିଇ ମୋକମି ଇଲେ ପ୍ରବୁଦି ମହିମା ଜାୟଆନାତ୍ ମାରି ପ୍ରବୁଦି ଆମ୍ବା ମାତାନ ସସିମାନି ଆୟା ମହିମାଦି ଆଟ୍ ନିମାତାନ ମାତ୍ର ନାଣ୍ଟ ଜାୟ ଇସାବତାନ ଖାନି ମୁତ୍ ଖାଜା ବାଦ୍ଲେ ଆଜିନିକା ।

୪

୧ ମାପୁରୁଦି ଦୟା କିଜି ମାଙ୍ଗ୍ ଇୟା ସେବା ପାଣି ସିତିମାନିଙ୍ଗ୍ ମାତ୍ର ଝୁଝିକାସିଲି ଲୋକା ଖାଜା କିଇକା ।

୨ ସେମାରୁତି ମାରି ଆରେତିପାଣି କିତି ପାଣି ଝିନ୍ତୁ ମାତ୍ର ତ୍ରିସିନିକା । ମାପ୍ ଟକେ କିଏପ୍ ମାରି ମାପୁରୁଦି ବାକ୍ୟଦିଙ୍ଗ୍ ତାଗ୍ ଉର୍ଦ୍ଧ୍ବ କିଏପ୍

। ମାତର ତରାନି ଇସାବତାନ ମାପୁରୁଦି ଆଗଡ଼ି ଲୋକା ବୁଦି ଲାକୁଡୁ
ମାପ ନିଜେ ନିଜେଦି ସତ୍ ପାରମାଣ୍ କିନି ଉଣ୍ଡିଙ୍ଗ ଚେଷ୍ଟାକିଜିନାପ;

୩ ମାତର ମା ମାତାନ ପ୍ରଚାର ଆତିମାନି ସୁସମାରାର ଜଦି
ମାରଗିନାମାନାଡ଼, ଆରତିଙ୍ଗ ଆରେତି ନାସ୍ଥାନିଲୋକା ଉଣ୍ଡିଙ୍ଗ ଆକା
ମାରଗିନାମାନାଡ଼ ।

୪ ଖାର ବିସ୍ବାସ କିଏରେ, ଇରିଙ୍ଗ ଖାରି ମନ୍ତିଙ୍ଗ ଇୟା ଦୁନିଆଦି
ଦିୟାମ୍ କାଣା କିତାମାନାଡ଼ । ଇସାବତାନ ମାପୁରୁଦି ମୁତ୍ ଦି କ୍ରିସ୍ତଦି
ମହିମାନ୍ତିତ ସୁସମାରାରତି ଜାୟ ଖାରି ଲାକୁଡୁ ସଲ୍ଏଡ଼ନି ।

୫ ମାପ ନିଜେଦିଙ୍ଗ ପ୍ରଚାର କିଏପ୍, ମାତର କ୍ରିସ୍ତଦି ପ୍ରବୁ ଇଜି
ମାରି ଜିସ୍ତଦି ଉଣ୍ଡିଙ୍ଗ ନିଜେ ନିଜେଦିଙ୍ଗ ମି ସେବାକିନିକା ଇଜି ପ୍ରଚାର
କିନାପ୍,

୬ ଇରିଙ୍ଗ ଆମା ମାପୁରୁ ଇରଥାମାନାନ୍, “ସିକାଟିଦି ଲୋଇରାନ୍
ଜାୟତିକା ଆନିକା,” ଆୟା ମାପୁରୁ କ୍ରିସ୍ତଦି ମୋକମତାନ୍ ସାକ୍ତିଦି
ମହିମା ସୁଡ଼ନି ଉଣ୍ଡିଙ୍ଗ ମା ଜିବନ୍ତୁ ଜାୟ କିତାମାନାନ୍ ।

୭ ମାତର ମାତୁ କେବଲ ମା ସାମାନ୍ତି ସିକିଲା ସାଟିଦୁ ଇୟା
ମୁସକୁପୁରତି ଦନ୍ସମ୍ପତି ପୟତିମାନିକା । ଇବେଣ୍ଟକୁ ପାରମାଣ୍
ଆତାମାନାଡ଼ ଜେ, ଇୟାଖଜା କାବାଆନି ସାକ୍ତି ମାଦି ଆଏଡ଼, ମାତର
ମାପୁରୁଦି ।

୮ ମାପ୍ ଝିକୁ ଦୁଃଖ କାଷ୍ଟ ହୋଇଜିନାପ୍, ମାତର ନିରାସ୍ ଆଏପ୍ ।
ବେଡ଼ା ବେଡ଼ାଦୁ ତିଲାଜିନାପ୍ ମାତର ନିରାସ୍ ଆଏପ୍ ।

୯ ମାପ୍ ଦୁଃଖକାଷ୍ଟ ପୟତାପ୍, ମାତର ମାପୁରୁ ମାଙ୍ଗ୍ ଏସକାଙ୍ଗ୍
ବା ତିସ୍ଏନ୍ । ଏସ ବେଡ଼ାଦୁ ମାପ୍ କାଷ୍ଟ ପୟତାମାନାପ୍, ମାତର ଦ୍ଵଂସ
ଆଏପ୍ ।

୧୦ ଜିସ୍ତଦି ଜିବନ୍ ଏଣ୍ଡେସ୍ ମାମାନୁ ଝେଙ୍ଗ୍ ନାଡ଼, ଆୟାଉଣ୍ଡିଙ୍ଗ୍
ମାତୁ ଝିକୁଦିନ୍ ମା ମେନ୍ଦଲ୍ତୁ ଜିସ୍ତଦି ସାନିକା ପିଡ଼ିଜିନାପ୍ ।

୧୧ ଜିସ୍ତଦି ଜିବନ୍ତିଙ୍ଗ ଇୟା ସାତି ମେନ୍ଦଲ୍ତାନ୍ ଝେକନି ଉଣ୍ଡିଙ୍ଗ୍
କ୍ରିସ୍ତଦି ଉଣ୍ଡିଙ୍ଗ୍ ଝିକୁଦିନ୍ତି ଜିବନ୍ ମାତୁ ସାନି ମାନୁ ଆରତି ମାନିକା ।

୧୨ ମାରି ଇୟାଖଜା ଦାନ୍, ମାମାନୁ ସାନିକା ମାରି ମି ଲୋଇ
ଜିବନ୍ତି ପାଣି କିଜି ସାଲାନିକା ।

୧୩ ଦର୍ମସାସ୍ତ୍ରଦୁ ରାସାତା ମାନାଡ଼, “ନାନ୍ ବିସ୍ବାସ କିନି ଉଣ୍ଡିଙ୍ଗ୍

ଝାରଗିତା ।” ମାତୁ ଆୟା ବିସ୍ବାସ୍ତ ଆମ୍ବା ପୟତିମାନିକା । ମାତୁ ବିସ୍ବାସ୍ କିଜିନିକା, ଆଦେଙ୍ଗ୍ ଝେରସିନାପ୍ ।

୧୪ ମାପୁ ନେସିନିକା, ମାପୁରୁ ପ୍ରବୁ ଜିସୁଙ୍ଗ୍ ସାତିମାଣୁକୁ ଜିବନ୍ କିତାମାନାନ୍ । ଆୟା ମାପୁରୁ, ଜିସୁଦି ଝାଲେ ମାଙ୍ଗ୍ ବା ଜିବନ୍ କିନାନ୍ ମାରି ମି ଝାଲେ ମାଙ୍ଗ୍ ଝାନି ଲାକ୍ତୁ ଅନାନ୍ ।

୧୫ ମି ନେଗି ଉଣ୍ଡିଙ୍ଗ୍ ଇୟାଝିଜୁ ଗଟାଜିନାଡ୍ । ମାପୁରୁଦି ଦୟା ମାରି ନାଣ୍ଡଦାନ୍ ନାଣ୍ଡ ପିରଜି ଲୋକାଙ୍ଗ୍ ମୁରୁତାଡ୍, ମାରି ଗାଦିଲୋକ୍ ନେଗି ମୋନ୍ତାନ୍ ମାପୁରୁଦି ଗୌରବ୍ କିନାଡ୍ ।

ବିସ୍ବାସ୍ତ ଜିବନ୍

୧୬ ଇୟାଉଣ୍ଡିଙ୍ଗ୍ ମାପ୍ ଏସକାଙ୍ଗ୍ ନିସାର୍ ଆଏପ୍ । ମା ମେନ୍ଦଲ୍ ଦିରେ ଦିରେ ଝିଜିନାଡ୍ । ମାତର୍ ମା ଜିବନ୍ତିଆମ୍ବା ଦିନ୍ତିଙ୍ଗ୍ ଦିନ୍ ପୁନିକା ଆଜିନାଡ୍ ।

୧୭ ଇୟା ଇସିମାଗା ମାରି ଅଡ୍ପତି ଦୁକ୍ କାସ୍ତୁ ମା ଉଣ୍ଡିଙ୍ଗ୍ ତାସିନାଡ୍ ଇସାବ୍ସିଲି ଝିଜୁଦିନ୍ତି ଗୌରବ୍ ପୁରା କିଜିନାଡ୍ । ଇୟା ଗୌରବ୍ ଦୁଃକ୍‌କାସ୍ତଦାନ୍ ପେରିକା ।

୧୮ ମା କାଣ୍ଗା ସୁଡନ୍ତି ଜିନିସ୍ ମୁସକୁ ସିଲେ, ମାତର୍ ତରଇ ଜିନିସ୍ ମୁସକୁ ସୁଡନ୍ତିନିକା, ଇରିଙ୍ଗ୍ ତରନି ଝିଜୁ ଜିନିସ୍ ସାଣେକ୍ତିଙ୍ଗ୍, ମାତର୍ ଆମାକା ତରଏଡ୍, ଆକା ଝିଜୁଦିନ୍ ତେବାନାଡ୍ ।

୫

୧ ମାପୁ ନେସିନିକା, ଏମେ ଦୁନିଆଦି ମେନ୍ଦଲ୍ତି ଝାଜା ଗୁଡାଦୁ ମାପୁ ଇଲେଇ ବାସା କିଜିନିକା, ଆକା ନାସ୍ତୁ ଆତିଆଙ୍ଗ୍, ମାଙ୍ଗ୍ ମାପୁରୁଦି ମୁସକୁପୁରତୁ ଉନ୍ତି ଝିଜୁଦିନିତି ଇଲୁ ଜଗେକିନାନ୍ । ଆକା ଲୋକ୍ କିୟାଦାନ୍ ତିଆର୍ କିତିକା ଆଏଡ୍ ନିଜେ ମାପୁରୁ ଆକା ତିଆର୍ କିତାମାନାନ୍ । ଆକା ଝିଜୁଦିନ୍ ତେବାନାଡ୍ ।

୨ ଇୟା ଦୁନିଆଦି ଇଲୁଦୁ ମାନ୍‌ଜି ମାପ୍ ଆୟା ମୁସକୁପୁରତି ଇଲୁଝାଜା ଆଙ୍ଗ୍ ଆରାଦେଙ୍ଗ୍ ଝେଡିକା କିଜିନାପ୍ ।

୩ ମାତର୍ ଆୟା ମୁସକୁପୁରତି ଇଲୁଦୁ ସରିଆଙ୍ଗ୍, ମା ମେନ୍ଦଲ୍‌ନାଗାଡା ତରଏଡ୍ ।

୪ ମାପୁ ଇୟା ଦୁନିଆଦି ଗୁଡ଼ାଦୁ ମାନିଖାଲେ ଝିଜୁଦିନ୍ତି ଜିବନ୍
ଆଡ଼ାବାଜିନାଡ଼ । ଦୁନିଆଦି ମେନ୍ଦଲତିଙ୍ଗ ଡିସିତେଙ୍ଗ ମା ଆସା
ସିଲେଡ଼, ମାତର୍ ମାପୁ ଅଡ଼ବିନାପୁ, ମୁସକୁପୁରତି ଆଙ୍ଗୁ ଆରାନି
ମାଣକୁ ମା ଇୟା ସାତି ମେନ୍ଦଲ୍ ଏଣ୍ଡେସ୍ ଝିଜୁଦିନ୍ତିଙ୍ଗ ନେଗିକା
ଆନାଡ଼ି ।

୫ ମାପୁରୁ ମାଙ୍ଗୁ ଇୟା ବାଦ୍‌ଲେଆନି ଉଣ୍ଡିଙ୍ଗ ତିଆର୍ କିତାମାନନ୍
। ମାରି ଇୟାକା ମା ଉଣ୍ଡିଙ୍ଗ ଖାନି ପବିତ୍ରଆମ୍‌ଦିଙ୍ଗ ଖାନ୍ ଖାନି ସିନା
ଖାଜା ମାଙ୍ଗୁ ଦାନ୍ କିତାମାନ୍ ।

୬ ଆୟାଉଣ୍ଡିଙ୍ଗ ମାପୁ ଝିଜୁଦିନ୍ ସାହାସ୍ ଆସ୍ତିମାନିକା । ମାପୁ
ନେସ୍‌ନିକା, ଏସ ଦିନ୍ ମାପୁ ଇୟା ମେନ୍ଦଲ୍‌ତୁ ମାନ୍‌ଜିନିକା, ନାସ ଦିନ୍
ପ୍ରବୁଦି ଇଲୁଦାନ୍ ଆକମାନିଜି ଜିଜି ମାଡ଼ିନିକା ।

୭ ଇରିଙ୍ଗ ମା ଜିବନ୍ ତରୁନି ବିସୟ୍ ମୁସକୁ ଜିଜି ମାଡ଼ିଏଣ୍‌ଗା ମାତର୍
ବିସ୍‌ବାସ୍ ମୁସକୁ ଜିଜି ମାଡ଼ିନିକା ।

୮ ଆଦେଙ୍ଗୁ ମାପୁ ସାହାସ୍‌ତାନ୍, ମାରି ଇୟା ମେନ୍ଦଲ୍ ଡିସ୍‌ସି ପ୍ରବୁ
ଖାଲେ ବାସା କିନି ଉଣ୍ଡିଙ୍ଗ ମାପୁ ନାଣ୍ଡୁ ଝେଡ଼ିକା ।

୯ ଆୟାଉଣ୍ଡିଙ୍ଗ ଆଡ଼ରେ ଆପିଡ଼ ଇଲୁଦୁଆପିଡ଼ ମାପୁରୁଙ୍ଗୁ ଝେଡ଼ିକା
କିଦେଙ୍ଗୁ ହୁଁ ମା ଉଣ୍ଡେ ବଦା ।

୧୦ ଇରିଙ୍ଗ ମା ଝିଜେରିଙ୍ଗ ଖାନିମାଡ଼ାନ୍‌କୁ ବିଚାର୍ ଆଦେଙ୍ଗୁ
ସତେନ୍ କ୍ରିସ୍ତଦି ଆଗଡ଼ି ନିଶ୍ଚରେଙ୍ଗ ପଡ଼ାନାଡ଼ । ନାସ୍ତିଖାଲେ ସାନି
ମେନ୍ଦଲ୍‌ତୁ ମାଡ଼ୁ କିତିମାନି ନେଗିକା ବା ତାଗ୍‌ଇକା, ଝିଜୁ ପାଣିକିତି
ଇସାବ୍‌ତାନ୍ ମାଡ଼ୁ ପଲ୍ ପୋଇନିକା ।

କ୍ରିସ୍ତଦି ନାଡ଼ି ପାଣି ଉଣ୍ଡିଙ୍ଗୁ ମାପୁରୁଦିଖାଲେ ତଡ଼ୁ

୧୧ ମାପୁରୁଙ୍ଗୁ ତିଲାନି ଅର୍ତ୍ତ ଇନିକା, ମାପୁ ନେସ୍‌ତାମାନାପୁ, ମାରି
ଇକା କିନି ଉଣ୍ଡିଙ୍ଗ ମାପୁ ଝିଜେରିଙ୍ଗ ଝେର୍‌ତାମାନାପୁ । ମାପୁରୁ
ମାଙ୍ଗୁ ଝିଜେରିଙ୍ଗ ନେଗେନ୍‌ତାନ୍ ନେସ୍‌ତା ମାନାନ୍ । ନାନୁ ଆସା
କିଜିନା, ମି ବୁଦିଦାନ୍ ନାଙ୍ଗୁ ନେଗେନ୍‌ତାନ୍ ନେସ୍‌ନିଦେର୍ ।

୧୨ ମାପୁ ମାରିଡେସି ମି ଲାକ୍‌ତୁ ମାପୁ ଜିବନ୍ ଗର୍ବ କିଦେଙ୍ଗୁ ଇଛା
କିଏଜିନାପୁ । ମାତର୍ ମା ବିସୟ୍‌ତାନ୍ ଟିକ୍‌ତାନ୍ ଗର୍ବ କିନି ଉଣ୍ଡିଙ୍ଗୁ

ମିଙ୍ଗୁଁ ସୁଜୋଗ ସିଦେଙ୍ଗ ମା ଉଦେସ୍ । ଆରତିଙ୍ଗ, ମୋନତି ଗୁଣ୍ଡ
ସୁତ୍ତୁଜି କେବଲ ଆତେରି ଖେଡ଼ିକା ସୁତ୍ତୁଜି ଏମେକାର ଗର୍ବ କିନାର,
ଝାରିଙ୍ଗ ମିର୍ ଟିକ୍ ବେଡ଼ାଦୁ ଉତର ସିଦେଙ୍ଗ ଆଟିନିଦେର୍ ।

୧୩ ମାଦି ଇନିକା ବୁଦିବେମ୍ବି ଆତାମାନାଡ଼ ? ମାଦି ଜଦି ବେମ୍ବିରି
ଆନାମାନାଡ଼, ଆକା ମାପୁରୁଦି ଉଣ୍ଡିଙ୍ଗ ଆତାମାନାଡ଼ । ମାପ୍ ଇନିକା
ଆୟା ନାନିଲୋକ ? ମାପ୍ ଜଦି ଆୟା ନାନିଲୋକ, ଆରତିଙ୍ଗ ମି
ଉଣ୍ଡିଙ୍ଗ ଆୟାଝାଜା ମାନାପ୍ ।

୧୪ କ୍ରିସ୍ତଦି ଜିବନ୍ନନି ମାଣାନ୍ ମାପୁ ବୁଲାଇସାଜିନିକା । ମାତୁ
ବୁଲାଇନିକା ଜେ, ଅରେନ୍ ଝିଜେରିଉଣ୍ଡିଙ୍ଗ ସାତିମାନିଙ୍ଗ ଝିଜେରେ
ଆୟାଝିଜେରେ ସାତିମାନ୍ ମିସାତାର୍ ।

୧୫ ଝାନ୍ ଝିଜେରି ଉଣ୍ଡିଙ୍ଗ ସାତିମାନିଙ୍ଗ ଏମେକାର ଜିବନ୍ ମାନାର୍,
ଝାର୍ ମାରି ନିଜେଦି ଉଣ୍ଡିଙ୍ଗ ଜିବନ୍ଜାପନ୍ କିଏଜି ଝାନିଉଣ୍ଡିଙ୍ଗ ଜିନାର୍,
ମାତର ଝାନିଉଣ୍ଡିଙ୍ଗେନ୍ ଝାନ୍ ସାଜି ମାରିତେସି ନିଙ୍ଗୁଁତାମାନାନ୍ ।

୧୬ ମାପ୍ ମାରି ଏମେଝାନିଙ୍ଗ ଲୋକା ଇସାବ୍ତାନ୍ ବିଚାର୍ କିଏପ୍ ।
ବେଡ଼ା ମାରାଡ଼ ନାସ୍ତିଝାଲେ ମାପୁ କ୍ରିସ୍ତଦିଙ୍ଗ ବା ଲୋକା ଇସାବ୍ତାନ୍
ବିଚାର୍ କିଜିମାର୍ହାପ୍ । ମାତର ଇଲେ ମାରି ମାପୁ ଆୟାଝାଜା
କିଏଜିନାପ୍ ।

୧୭ କ୍ରିସ୍ତଦି ଝାଲେ ମିସାତିଙ୍ଗ, ଲୋକୁ ପୁନିକାନ୍ ତିଆର ଆନାଡ଼ ।
ପାଡ଼ଇ ବିସୟଝିଜୁ ମାରିଗିତା ସର୍ହାମାନାଡ଼, ମାରି ପୁନି ବିଷୟ ଆତାନ୍
।

୧୮ ଇୟାଝିଜୁ ମାପୁରୁଦି ପାଣି । ଝାନ୍ କ୍ରିସ୍ତଦି ମାଡ଼ାନ୍କୁ ମାଙ୍ଗୁଁ
ଝାନିଝାଲେ ମାରି ମିସାକିତା ମାନାନ୍ ମାରି ଝାନିଝାଲେ ଆଇଝାରିଙ୍ଗ
ବା ମାରି ମିସା କିନି ଉଣ୍ଡିଙ୍ଗ ଝାନ୍ ମାଙ୍ଗୁଁ ସେବା ଦାୟିତ୍ବ ସିତାମାନାନ୍
।

୧୯ ଆରତିଙ୍ଗ ମା କାବୁର୍ ଆଜିନାଡ଼, ମାପୁରୁ କ୍ରିସ୍ତଦି ମାଡ଼ାନ୍
ଝିଜୁ ଦୁନିଆଦି ଲୋକାଙ୍ଗ ଝାନି ଝାଲେ ମାରି ମିସା କିନି ଉଣ୍ଡିଙ୍ଗ
ନିୟମ କିତାମାନାନ୍ । ଝାନି ବିରୁଦ୍ଧତାନ୍ ଝାରି ପାପ୍ଝିଜୁ ଝାନ୍ ମାରି
ଝାନି ଇସାପ୍ତାନ୍ ଇଡ଼ଏନ୍ । ମାରି, ଇୟା ପୁନି ମିସାକିନି କାବୁର୍
ଝେରତେଙ୍ଗ ଦାୟିତ୍ବ ମା ମୁସୁକୁ ବୋଜୁ ସିତାନ୍ ।

୨୦ ଆରତିଙ୍ଗ ମାପ୍ କ୍ରିସ୍ତଦି ତରିଗାନ୍ ଇୟା ବଲୁ ଇଜିନାପ୍ । ନିଜେ
ମାପୁରୁ ମା ମାଡ଼ାନ୍କୁ ଇୟା କୁକ୍ନିକା ସିତାମାନା ଇଜି ଅଡ଼ବିଦେଙ୍ଗୁଁ ।

ଆନାତ୍ । କ୍ରିସ୍ତଦି ତରିଟାନ୍ ମାପୁ ମାଡ଼ିସ୍ କିଜିନାପ୍, ମାପୁରୁ ବାଦେଲେ
କିପିନ୍ ମିଙ୍ଗ୍ ସାତୁଦାନ୍ ତଡ଼ଆଦେଙ୍ଗ୍ । ମାପୁରୁଦି ଖାଲେ ପୁନା
ମିସାଦୁ,

୨୧ ମାତର କ୍ରିସ୍ତମାନୁ ପୁରା ପାପ୍ ସିଲେତିଙ୍ଗ୍ ବା, ମାପୁରୁ ଖାନିଙ୍ଗ୍ ମା
ଉଣିଙ୍ଗ୍ ପାପ୍ତି ପୁଜା ଖାଜାକିତାନ୍, ମାଡ଼ ଏଣ୍ଡେସ୍ ଖାନିଖାଲେ ମିସାଜି
ମାପୁରୁଦି ଦାର୍ମପାଣିଦୁ ମିସାଦେଙ୍ଗ୍ ଆଟିନିକା ।



୧ ମାପୁରୁଦି ଉଣିଙ୍ଗ୍ ଅରସେ ପାଣି କିତିମାନିଙ୍ଗ୍ ମାପ୍ ମିଙ୍ଗ୍
ମାଡ଼ିସ୍ କିଜିନାପ୍, ମି ଜିବନ୍ତୁ ମାପୁରୁଦି ଦୟା ଆରେଏ କିମାଟ୍ ।

୨ ଝେନ୍ତୁ ଆମାକା ମାପୁରୁ ଇନାନ୍ :

“ମି ଉଣିଙ୍ଗ୍ ଦୟା ତରନ୍ତି ବେଡ଼ା ଖାତିମାନିଙ୍ଗ୍

ନାନ୍ ମି ପାରତାନା ଝେନ୍ତୁଆ,

ରକ୍ଷାଦି ନାଣିଙ୍ଗ୍ ମି ସାକା ଆତା ।”

ଝେନ୍ତୁ ! ଇକା ଆଜିନାଡ଼, ମାପୁରୁଦି ଦୟା ମାନାନି ବେଡ଼ା । ନେରୁ
ଆଜିନାଡ଼ ରକ୍ଷାଦି ଦିନ୍ ।

୩ ଆମା ସେବାକିନି ବାତି ମାପ୍ ପୟ୍ତା ମାନାପ୍, ତାନି ଦସ୍ ଏଣ୍ଡେସ୍
ଆଏଡ଼, ଆୟାଉଣିଙ୍ଗ୍ ମାପ୍ ଏମେଖାନି ପାଣିଦୁ ବାଦା ସିଏପ୍ ।

୪ ମାରି ମାଡୁ ଝିଜୁ ଅବସ୍ଥାଦୁ ନିଜେଦିଙ୍ଗ୍ ମାପୁରୁଦି ସେବାକିନିକା
ଖାଜା ଜାଣାସିନା କିଜିନାପ୍ । ନାଣ୍ଡ ସାହାସ୍ତାନ୍ ମାପ୍ ଝିଜୁ ରକମ୍ତି
କାସ୍ତୁ କାକୁତ୍ ମାରି କାସ୍ତୁ ସାସ୍ତିକିତାମାନାପ୍;

୫ ମାପ୍ ମାଡ଼ ତିରୁଆର୍ହାପ୍, ଜେଲଦଣ୍ଡ ବୋଗକିତାମାନାପ୍, ଜୁଦ୍ଦୁ
ସାମ୍ନା କିତାମାନାପ୍; ନାଣ୍ଡକାସ୍ତୁପାଣି କିତାମାନାପ୍, ଅନିଦ୍ରାଆଜି
ତେବାତାପ୍ ମାରି କାଦି ଉଣ୍ଡୁଏଣ୍ଡା ତେବାତାମାରାପ୍ ।

୬ ମା ପବିତ୍ରତା ବୁଦି, ସାହାସ୍, ଦୟା, ସଡ଼ ଜିବନ୍ତନୋନିକା ମାରି
ସଡ଼ତି ମାଟା ଉଣିଙ୍ଗ୍ ପବିତ୍ର ମାପୁରୁଦି ସାକ୍ତିଦାନ୍ ମାପ୍ ମାପୁରୁଦି
ସେବକ ଇଜି ପରିଚୟ ସିତାମାନାପ୍,

୭ ସଡ଼ ବାକ୍ୟଦୁ, ମାପୁରୁଦି ସାକ୍ତିଦୁ ଉଣ୍ଡେରି ତରିନ୍ ନି ତେବ୍ରି ତରିନ୍
ବିରୁଦ୍ତାନ୍ ଲଡ଼େଇ କିନି ଉଣିଙ୍ଗ୍ ଦାର୍ମ ଜିବନ୍ ମା ପେରି ସାଜୁ ।

୮ ମାୟ ସନ୍ମାନ ଆଜିନାୟ ମାରି ଅପମାନିତ ଆଜିନାୟ, ପ୍ରସଂସା ମାରି ସେମାର ପୟଜିନାୟ । ମାଙ୍କୁ ମିରୁଆର ଇତି ଅପମାନ ସିତାମାନାର, ଆତିଙ୍କୁ ବା ମାୟ ପୁରା ସତ୍ତ୍ୱ ଇତିନାୟ ।

୯ ମାୟ ନେସ୍ତି ଲୋକ ଆଜି ବା ନେସ୍ତି ଲୋକା ଖାଜା, ଜିବନ୍ ମାନଜି ବା, ସାତିକାର ଇତି ଦର୍ପୟତାୟ । ମାୟ ଦଣ୍ଡ ପୋଇତାମାନାୟ, ମାତର ସାଏୟ ।

୧୦ ମାୟ ଆଡ଼ବାଜି ବା ଖିଜୁଦିନ୍ ଖେଡ଼ିକା । ମାୟ କାକୁତ ଖାଜା ତରାଜିନାୟ, ମାତର ଏସ ଲୋକାଙ୍କ ମାଜନ୍‌କିତାମାନାୟ । ମାଙ୍କୁ ଇନିକା ସିଲେତିଖାଜା ମନେଆଜିନାଡ଼, ମାତର ସତ୍ତ୍ୱାନ ମାୟ ଖିଜୁଦି ଅଦିକାରିର ।

୧୧ କରନ୍ତିଦି ଲାଡ଼ତି ତଡ଼ାନକୁ ନି ତାଙ୍କୁ ମାୟୁ ସୁରି ଖାରଗିନି ଲୋକ ସିଲେ ମିଙ୍କୁ ଖିଜୁ ଇର୍ହାମାନାୟ । ମି ଲାକୁଡ଼ୁ ମା ଜିବନ୍ ରେତା ସିତାମାନାୟ ।

୧୨ ମାୟୁ ମି ଉଣ୍ଡିଙ୍କ କେରେପ୍ତି ଜିବନ୍ ଆଏୟ, ମାତର ମି ଜିବନ୍ ମା ଉଣ୍ଡିଙ୍କ କେର୍‌ବିତାମାନାଡ଼ ।

୧୩ ମିଙ୍କୁ ନା କଡ଼ର ଇତି ଅଡ଼ବିଜି ଇୟାଖିଜୁ ଇଜିନା । ମା ଅଡ଼ବିନି ଇସାବତାନ ମି ଜିବନ୍ ରେଆପିଡ଼ ।

ଅବିସ୍‌ବାସିରି ଖାଲେ ଜାସେ ଆମାଟ୍

୧୪ ମିର୍ କ୍ରିସ୍‌ଦିମାନୁ ଏମେକାର ବିସ୍‌ବାସ୍ କିଏର୍ ଖାରିଖାଲେ ସାମାନ ପାଣି କିଦେଙ୍କ ସେଷ୍ଟା କିମାଟ୍ । ଇକା ଏସାଙ୍କ ବା ଆଦେଙ୍କୁ ଆଟ୍‌ଏଡ଼ । ଦାମ୍ ମାରି ଅଦାମ୍ ମିସାନେ ଏମେ ? ଜାୟ ନି ସିକାଟି ଏଣ୍ଡେସ୍ ଅର୍‌ସେ ତେବାନେ ?

୧୫ କ୍ରିସ୍ ମାରି ସୟତାନ ଏଣ୍ଡେସ୍ ଉଣ୍ଡେ ମାଟା ଆନାର ? ବିସ୍‌ବାସି ଖାଲେ ଅବିସ୍‌ବାସି ଏମେ ବିସ୍‌ୟତୁ ଉଣ୍ଡେ ମାଟା ଆଦେଙ୍କ ଆନ୍‌ନାର ?

୧୬ ମାପୁରୁଦି ମନ୍ଦିରୁଡ଼ୁ ଏଣ୍ଡେସ୍ ଦିୟାମ୍ ତିଆର୍ ଆନାଡ଼ ? ମାଡ଼ ତୋ ଜିବନ୍‌ମାନି ମାପୁରୁଦି ମନ୍ଦିର, ଇରିଙ୍କ ମାପୁରୁ ନିଜେ ଇର୍ହାମାନନ୍, “ନା ଲୋକାଖାଲେ ନାନୁ ବାସାକିନା ମାରି ଖାରି ମାନୁ ତେବାନା; ନାନୁ ଖାରି ମାପୁରୁ ଆନା ମାରି ଖାର ନା ନିଜେ ଲୋକ ଆନାର ।”

୧୭ ଆଦେଇଁ ପ୍ରବୁ ଇନାନ,
 “ଝାରି ମାଡ଼ାନକୁ ମିର୍ ସୋହସିରାଦୁ,
 ଝାରିମାଡ଼ାନକୁ ନିଜେଦିଇଁ ଖେରଏ କିଦୁ ।
 ତାରୁଇ ବିସୟତି ଝାଲେ ମିସାମାର୍,
 ଆରତିଇଁ ନାନୁ ମିଇଁ ଆସନା ।
 ୧୮ ନାନୁ ମି ବୁବା ଆନା, ମାରି ଆନିଦେର ନା କଡ଼ର୍ ଆଇଲିକ୍,
 ସର୍ବସାକ୍ତିମାନ ପ୍ରବୁ ଇୟା ବଲୁ ଇନାନ ।”



୧ ତଡ଼କୁ ନି ତାଇଁକ୍ ଇୟାଝିକୁ ମାଟା ମାଡ଼ ମାପୁରୁଦିମାଣାନ
 ପୋଇତିମାନିକା । ଆଦେଇଁ ରାଦୁ, ମେନ୍ଦଲ୍ ମାରି ଆମ୍ବଦିଇଁ
 ତାରୁଇକାକିତିମାନୁ ଝିକୁ ବିସୟତାନ ନିଜେ ନିଜେଦିଇଁ ନରନାର୍ ।
 ମାରି ମାପୁରୁଦିଇଁ ତିଲାଇ ପୁରା ପବିତ୍ର ଝାଜା ଜିନାର୍ ।

ପାଉଲ୍‌ତି ଝେଡ଼ିକା

୨ ମି ଜିବନ୍‌ତୁ ମାଇଁ ବାଡ଼ି ସିଦାର୍ । ମାପ୍ ଏମେଝାନିଇଁ ଅନ୍ୟାୟ
 କିଏପ୍, ଏମେଝାନିଇଁ ନାଷ୍ଟକ୍ରିଏପ୍ ଇରିଇଁ ଏମେଝାନି ମାଡ଼ାନକୁ
 ଇନିକା ଲାବ୍ ପୟଦେଇଁ ଚେଷ୍ଟାକିଏପ୍ ।

୩ ମିଇଁ ଦୋସ୍ ସିଦେଇଁ ନାନୁ ଇୟା ବଲୁ ଇନ୍‌ଏ । ନାନୁ
 ଆଗଡ଼ିରାନ ଇଜିନା, ମିର୍ ମା ନିସ ଲାଡ଼ ଜେ ମାପ୍ ଜିତିଇଁ
 ଉଣ୍ଡେ ମାନୁ ଜିନାର୍ ମାରି ସାତିଇଁ ଉଣ୍ଡେ ମାନୁ ସାନାର୍ ।

୪ ମି ମୁସୁକୁ ନା ବେସି ଆସା ମାନାଡ଼ । ମି ଉଣ୍ଡିଇଁ ନାନୁ ଗର୍ବ ବା
 ନାଣ୍ । ଦୁକ୍ କାସ୍ ବେଡ଼ାଦୁ ନାନୁ ସାହାସ୍ ତରତାମାନା । ଝେଡ଼ିକାଦୁ
 ମୁଜିତାମାନା ।

୫ ଇୟାଝାଜାକି ମାସିଦୋନିଆଦୁ ଇତିଝାଲେ ମାପ୍ ରମ୍‌ଏତାପୁନି
 । ଝିକୁମାନୁ ଅସାନ୍ତି ମାରି ଜାଟି ଲାଗାତାମାରାଡ଼, ଆଦେଇଁ ମା
 ମୋନତୁ ସାନ୍ତି ସିଲେତାଡ଼ ।

୬ ମାତର ଏମେ ନିରାସ୍ତି ଝାରିଇଁ ସାସ୍ ସିଜିମାନି ମାପୁରୁ
 ତିତସତିଇଁ ପୋକ୍‌ସି ମାଇଁ ଝେଡ଼ିକା ସିତାମାନାନ ।

୭ କେବଲ୍ ଝାନି ଝାନିମାଣାନ ସିଲେ, ମାତର ଝାନ ମି ଲାକୁତୁ
 ସଲ୍‌ସି ଏମେ ଝେଡ଼ିକା ପୋଇତାମାନାନ, ଆୟାମାଡ଼ାନ ମାପ୍

ଝେଡ଼ିକା ଆତାମାନାୟ । ନାଜି ସୁଡ଼ବୁଦଙ୍ଗ ମି ଏସ ଝେଡ଼ିକା, ନା
ଉଣ୍ଡିଙ୍ଗ ମି ଏସ ଦୁକ୍, ନାଜି ସାସ୍ କିଦେଙ୍ଗ ମିର୍ ଏସ ଝେଡ଼ିକା,
ଇୟାଞ୍ଜିନ୍ ବିସୟ ଝାନ୍ ନାଜି ଝେରତାମାନାନ୍ । ଆବେଶାନ୍ ନାନୁ
ନାଶୁ ଝେଡ଼ିକା ଆତାମାନା ।

୮ ନା ସିଟି ପୋଡ଼ାଜି ମିର୍ ମୁର୍ତ୍ତୀଆତିମାରିଙ୍ଗ ବା, ଆୟାଟିଟି
ରାସ୍ତିମାନିଙ୍ଗ ନା ମୋନତୁ ଇନି ଦୁକ୍ ସିଲେଡ଼ । ସିଟି ମିଙ୍ଗ୍
ସାଶେକ୍ତିଙ୍ଗ ଦୁକ୍ କିବିସ୍ତିକିତିମାନିଙ୍ଗ ନାନୁ ଦୁକ୍ ଆତାମାୟି ।

୯ ମାତର ମି ମୋନତୁ ଦୁକ୍ ସିତିମାନିଙ୍ଗ ସିଲେ, ମାତର ଇୟା
ଦୁକ୍ ମି ଜିବନ୍ତି ବୁଲାସାଲା ବାଦ୍ଲେ କିତିମାନିଙ୍ଗ ଇଲେଇ ନାନୁ
ଝେଡ଼ିକା କିଜିନା । ମାପୁରୁଦି ବଦା ଇସାବତାନ୍ ମିର୍ ଇୟା ଦୁକ୍
ସାସ୍ କିଜିନିଦେର୍ । ଆଦେଙ୍ଗ ମା ମାଡ଼ାନ୍ ମିର୍ ଇନି ରକମ୍ତି ନାଷ୍ଟୁ
ଆଇଦେର୍ ।

୧୦ ମାତର ଇୟାଞ୍ଜାଜାଦି ଦୁକ୍ ମାପୁରୁଦି ମାଡ଼ାନ୍ ବେବହାର୍ ଆଜି
ତାନିମାଡ଼ାନ୍ ଜିବନ୍ ବାଦ୍ଲେ ଆତିଙ୍ଗ ରକିୟା ପୁଟନାଡ଼ । ଇବେନୁ
ଟିକ୍ଟାକିନି ବିସୟ ସିଲେଡ଼ । ମାତର କେବଲ ଦୁନିଆଦି ଦୁକ୍ ସାନିକା
ଗଟେକିନାଡ଼ ।

୧୧ ଆଦେଙ୍ଗ ସୁଡ଼ଦୁ, ମାପୁରୁଦି ମାଡ଼ାନ୍ ବଦାଦାନ୍
ପୟତିମାନିଦେର୍ ଇୟା ଦୁକ୍ ମିଙ୍ଗ୍ ମୋନତୁ ଏସ ଝେଡ଼ିକା,
ଏସ ତିଲାନିକା, ଏସ ରିସା, ଏସ, ନିଜେଦିଙ୍ଗ୍ ଟିକ୍ କିଦେଙ୍ଗ୍ ଏସ
ସିକିୟା, ତାଗ୍ ଘାଣିକିନିଞ୍ଜାରିଙ୍ଗ ସାସ୍ତିସିଦେଙ୍ଗ୍ ଏସ ତାନ୍ତ୍ରା ମାନାଡ଼ ।
ଇୟାଞ୍ଜିନ୍ ବିସୟତାନ୍ ମିର୍ ଦୋସ୍ ସିଲିକାର୍ ପାର୍ମାଶ୍ ଆଜିନିଦେର୍
।

୧୨ ଜଦିବା ନାନୁ ମି ଲାକ୍ତୁ ରାସ୍ତା ସିଟି, ମି ମାଡ଼ାନ୍କୁ ଜେ
ଅନ୍ୟାୟ କିତାମାନାନ୍ ବା ଜେ ଅନ୍ୟାୟ ସାସ୍ କିତାମାନାନ୍, ତାନି
ଉଦେସ୍ତାନ୍ ନାନୁ ଆୟା ସିଟି ରାସ୍‌ଏମାରା । ମାତର୍ ମାପୁରୁଦି
ଆଗ୍ତି ମା ଉଣ୍ଡିଙ୍ଗ ମି ମାନାନିକା ଏସ ନାଶୁ ମାରି ।

୧୩ ଆୟା ଉଣ୍ଡିଙ୍ଗ ମାପୁ ଏସ ଝେଡ଼ିକା, ଆକା ଝେରନି ଉଣ୍ଡିଙ୍ଗ
ନାନୁ ଆୟା ସିଟି ରାସାତା । ମାପୁ କେବଲ ଝେଡ଼ିକା ଆଏପ୍ ।
ମିର୍ ତତସ୍ତିଙ୍ଗ ଞ୍ଜିନ୍ ବିସୟତି ସାହାଜ୍ୟ କିଜି ଏଣ୍ଡେସ୍ ଝେଡ଼ିକା
କିଜିନିଦେର୍, ଆକା ମାଙ୍ଗ୍ ବେସିଝେଡ଼ିକା ସିତାମାନାଡ଼ ।

୧୪ ଖାନି ଲାକୁତୁ ମି ଉଣ୍ଡିଙ୍ଗ ନାନୁ ଗର୍ବ କିଜିନା । ମାରି ଆୟାଉଣ୍ଡିଙ୍ଗ ନା ତାଲା ଆଡ଼ଗି ଆଏଡ଼ । ଏଣ୍ଡେସ୍ ମି ଲାକୁତୁ ମାପୁ ଝିଜୁଦିନ୍ ସଡ଼ ଇଜିଝାଜିନାପୁ, ଆୟାଝାଜା ତିତସତି ଲାକୁତୁ ମାପୁ କିତିମାନି ପେରି ମାଟେଙ୍ଗ, ମିର୍ ପାରମାଣ୍ ଆଏଡ଼ ।

୧୫ ମିର୍ ଝିଜେରେ ଏଣ୍ଡେସ୍ତାନ ଖାନିଙ୍ଗ୍ ଫାନାଜି ମାରିଇଦେର୍ ମାରି ତିଲାଜି ମାରି ତିର୍ଗିଜି ମୋନତୁ ଖାନିଙ୍ଗ୍ କୁକ୍ତିମାରିଇଦେର୍, ଇୟା ମାଟା ଅଡ଼ବିଜି ମି ଉଣ୍ଡିଙ୍ଗ ଖାନି ଜିବନ୍ନୋନିକା ମାରି ନାଣୁଆଜିନାଡ଼ ।

୧୬ ନାନୁ ଝିଜୁ ବିସୟତୁ ମି ମୁସୁକୁ ପୁରା ଆସା ଇଡ଼ଜି ଆଟ୍ତିମାନିଙ୍ଗ୍ ନାନୁ ଏସ ଝେଡ଼ିକା ।

୮

ବିସ୍ବାସତିକା ସିନିକା

୧ ☆ଏ ତଡ଼ାନୁକୁ ନି ତାଙ୍ଗ୍, ମାସିଦୋନିଆଦି ମଣ୍ଡଲିୟାଙ୍ଗ୍ ଏଣ୍ଡେସ୍ ମାପୁରୁଦି ଦୟା ପୋଇତାମାନାର୍, ଆକା ମିଙ୍ଗ୍ ଝେର୍ଡେଙ୍ଗ୍ ବଦା କିଜିନା ।

୨ ଖାର ନାଣୁକାସୁ ମାଣାନ୍କୁ ସିଜି ପରିକା ଆତାମାନାର୍ ମାରି ଖାର ବେସି କାକୁତ ଆତିଙ୍ଗ୍ବା, ଝିଜ୍ଜ ବଦାଦି ମାଡ଼ାନୁକୁ ନିଜେ ମୋନତି ଝେଡ଼ିକାଦାନ ଝେକ୍ତାମାନାର୍ ।

୩ ନାନୁ ସଡ଼ ବାବେ ଇଜିନା ଜେ, ଖାରି ବଦାଦାନ ନିଜେଦି ସାକ୍ତି ଇସାବ୍ତାନ ଇୟାଝାଜାନେ ନିଜେଦି ଆଟ୍ତି ମାଣାନ୍ ନାଣୁ ବା ଦାନ କିତାମାନାର୍ ।

୪ ଜିହୁଦାଦୁମାନି ମାପୁରୁଦି ଲୋକାଙ୍ଗ୍ ସେବାକିନି ଉଣ୍ଡିଙ୍ଗ ଖାରିଙ୍ଗ୍ ଦୟା ସିଆୟଆପିଡ଼ ଇଜି ଖାର ମାଙ୍ଗ୍ ବାତିଙ୍ଗ୍ ଫାଲିତାମାର୍ ।

୫ ଖାରିମାଡ଼ାନୁକୁ ମାପୁ ନିସ ଆସା କିଏତା ମାରାପ୍ । ଆଟ୍ତିନେ ଖାର ନିଜେ ନିଜେଦିଙ୍ଗ୍ ମାପୁରୁଦି ମାନୁ ସିଆୟଆଜି ମାରାର୍ ମାରି ଝେନେକା ମାପୁରୁଦି ଇଜ୍ଜା ଇସାବ୍ତାନ ନିଜେ ନିଜେଦିଙ୍ଗ୍ ମା ଉଦେସ୍ତାନ ସିଆଇଆତାର୍ ।

୭ ତିତସଦି ସାହାଜ୍ୟଦାନ ଇୟା ଦୟା ପାଣି ଆରାମ୍ ଆତାମାରାତ୍ । ତେନିଙ୍କୁ ସାଲାକିଜି ଇଡ଼ଦେଙ୍କୁ ମାରି ଇୟା ଜିବନ୍ନନି ଉଣ୍ଡିଙ୍କୁ ସେବାପାଣିଦୁ ମିଙ୍କୁ ସାହାଜ୍ୟ କିନିଉଣ୍ଡିଙ୍କୁ ତିତସତିଙ୍କୁ ଅନୁରଦ୍ କିତା ।

୮ ମିର୍ ଝିନ୍ଦୁ ବିସୟତୁ ମାଜନ୍ ଆତିମାନିଦେର୍ । ମି ବିସବାସ, ମାଟା ଖାରଗିଦେଙ୍କୁ, ଜ୍ଞାନ, ସାହାଜ୍ୟକିଦେଙ୍କୁ ଝେଡ଼ିକା ମାରି ମା ଉଣ୍ଡିଙ୍କୁ ଜିବନ୍ନନିକା ତରତେଙ୍କୁ ନାଣ୍ଡ ପରିଚୟ ସିତିମାନିଦେର୍ । ଆଦେଙ୍କୁ ଇୟା ଦୟା ସେବାପାଣିଦୁ ବା ଦାନ ସିନିକାନ୍ ଆଜି ଜିବନ୍ନନିକା ପରିଚୟସିଦୁ, ଇକା ନା ବଦା ।

୯ ଇୟା ବିସୟତାନ୍ ମି ଉଣ୍ଡିଙ୍କୁ ନାନୁ ଇନିକା ନିତିନିୟମ୍ କିଏଜିନା । କେବଲ ସେବାପାଣିଦୁ ଆଇଝାରିଙ୍କୁ ଝେଡ଼ିକାଦି କାତାସିଜି ମି ଜିବନ୍ନନି ସତ୍ ନେସିନି ଉଣ୍ଡିଙ୍କୁ ନାନୁ ଚେଷ୍ଟାକିଜିନା ।

୧୦ ମିର୍ ପ୍ରବୁ ଜିସୁ କ୍ରିସ୍ତଦି ଦୟା ବିସୟନେସୁ । ଝାନ୍ ମାଜନ୍ ଆତିଙ୍କବା ମି ଉଣ୍ଡିଙ୍କୁ ଗରିବ୍ ଆତାନ୍ ଝାନି କାକୁତ ମାଡାନ୍ ମିର୍ ବା ଏଣ୍ଡେସ ମାଜନ୍ ଆଦେଙ୍କୁ ଆଟିନିଦେର୍ ।

୧୧ ଇୟା ବିସୟତାନ୍ ମିଙ୍କୁ ନା ଇୟା ଆଦେସ, ଦରନ୍ ମିର୍ ଏମେକା ଆରାମକିତିମାରିଦେର୍, ଆକା ଇଲେଇ ଝିଜିସି କିଦେଙ୍କୁ ମି ଇଛା । ଇରିଙ୍କୁ ପାଣି କିଦେଙ୍କୁ ସିଲେ, ମାତର ପାଣିକିଦେଙ୍କୁ ଟିକ୍ ଝିକ୍ତେଙ୍କୁ ମିର୍ ଆଜିନିଦେର୍ ଆଗିଡ଼ି ।

୧୨ ଇଲେଇ ପାଣିକିଜି ସାଡୁ ମାରି ମି ସୁଜଗତାନ୍ ଆକା ଝିସତୁ । ନେଗିକାଆସିନି ବେଡ଼ାଦୁ ମି ଏମେ ଝେଡ଼ିକା ମାରାତ୍, ପାଣି ଝିଜିନିସାଦି ଆକା ଆସସ ଇଡ଼ଦୁ ।

୧୩ ମାତର ଦାନ ସିଦେଙ୍କୁ ଝେଡ଼ିକା ମାରିଙ୍କୁ, ଲୋକୁ ଝାନି ବଦା ଇସାବତାନ୍ ଆମାକା ଦାନ କିନାନ୍, ମାପୁରୁ ଆସନାନ୍ । ଝାନି ସିଦେଙ୍କୁଆଟିନି ଆଡ଼ରେ ଝାନ୍ ଇନିକା ସିପିନ୍ ଇଜି ମାପୁରୁ ବଦା କିଏନ୍ ।

୧୪ ମି ମୁସୁକୁ ଇୟା ବୋଜୁଦିଙ୍କୁ ତିଗଜ ଆଇଝାରିଙ୍କୁ ସୁକ୍ ସିଦେଙ୍କୁ ନାନୁ ବଦା କିଏଜିନା ।

୧୫ ମାତର ଇଲେଇ ମିଙ୍କୁ ନାଣ୍ଡ ମାନିଙ୍କୁ ସିଲିସାତି ଲୋକାଙ୍କୁ ସାହାଜ୍ୟ କିନିକା ମି ପାଣି । ବେଡ଼ା ଝାନାତ୍, ମିର୍ ସିଲିସାତି

ମାରୁଜ୍ଞାଲେ, ଖାରି ନାଶ୍ଟ ମି ଉଣା ପୁରା କିନି ଉଣିଙ୍ଗ ସାହାଜ୍ୟ କିନାଡ଼
। ଇୟାଞ୍ଜା ଇସାବତାନ ମିମାନୁ ସାମାନ ରକ୍ଷା କିଦେଙ୍ଗ ଆଟ୍‌ନାଡ଼
।

୧୫ ଦର୍ମସାସ୍ତ୍ରଦୁ ରାସାତାମାନାଡ଼, “ଏନ୍ ନାଶ୍ଟ ଉଣ୍ଡା କିତାନ୍, ଖାନିଦି
ଇନିକା ଏଜେଏତାଡ଼ । ଏନ୍ ଉଣା ଉଣ୍ଡା କିତାନ୍, ଖାନିଦି ଉଣା
ଆଏତାଡ଼ ।”

ତିତସ ନି ଖାନି ତଡ଼କୁ

୧୬ ମାପୁରୁଦି ଦନ୍ୟବାଡ଼ ଆପିଡ଼ । ଇରିଙ୍ଗ ମା ଖାଜା ତିତସତି ଜିବନ୍
ବା ମିଙ୍ଗ ସାହାଜ୍ୟ କିଦେଙ୍ଗ ଖେଡ଼ିକା ମାନାନ୍ ।

୧୭ ଖାନ୍ କେବଲ ମା ଅନୁରଦଦିଙ୍ଗ କୁକ୍‌ନିକା ଖେର୍‌ଏନ୍, ମାତର୍
ମିଙ୍ଗ ସାହାଜ୍ୟ କିନି ଉଣିଙ୍ଗ ନିସ ଖେଡ଼ିକା ଜେ, ନିଜେଦି ବଦାଦାନ୍
ମି ଲାକ୍‌ତୁ ସନ୍‌ଡେଙ୍ଗ ଖାନ୍ ବଦା କିତାମାନାନ୍ ।

୧୮ ଖାନି ଖାଲେ ମାରି ଅରେନ୍ ତଡ଼ାନ୍‌ତିଙ୍ଗ ମାପ୍
ପୋକ୍‌ତାତାମାନାପ୍ । ନେଗି କାରୁର୍ ପ୍ରଚାର୍ କିଦେଙ୍ଗ ଖିଜୁ
ମଣ୍ଡୁଲିଆଙ୍ଗା ଖାନ୍ ପୁରା ଖିଜୁତରିନ୍ ଖେଙ୍ଗ ତାମାନାନ୍ ।

୧୯ ମାରି ନାସ ସିଲେ, ପ୍ରବୁଦି ଗୌରବ୍ ମାରି ମା ନମସ୍ତାର୍
ଝିକ୍‌ନି ଉଣିଙ୍ଗ ଆମା ଉଣ୍ଡାକିତି ଦାନ୍‌ତି ଅନି ସେବା ପାଣି ମାପ୍
ପୟ୍‌ତାମାନାଡ଼, ଆବେନ୍ ମା ଅର୍‌ସେସନି ଉଣିଙ୍ଗ ଆଇଆଇ ମଣ୍ଡୁଲି
ଖାନିଙ୍ଗ ଆସ୍ କିତାମାନାଡ଼ ।

୨୦ ନିଜେଦି ବଦାଦାନ୍ ସିଆୟ୍‌ଆତିମାନି ଇୟା ଦାନଦିଙ୍ଗ ନାଶ୍ଟ
ଜାଗାରତାଦାନ୍ ମାପ୍ ବ୍ୟବହାର୍ କିଜିନାପ୍, ଏଣ୍ଡେସ୍ ମା ମୁସ୍‌କୁ ଏନ୍
ଦୋସ୍‌ତିଗିଦେଙ୍ଗ ଆଟ୍‌ଏନ୍ ।

୨୧ ମାତର୍ ମାପୁରୁଦି ଆଗିଡ଼ି ସିଲେ, ମାତ୍ର ଲୋକା ଆଗିଡ଼ି ବା ସଡ଼
ମାଡେଙ୍ଗ ମା ବଦା ।

୨୨ ଆର୍‌ତିଙ୍ଗ ଖାରି ଖାଲେ ଇୟା ମା ତଡ଼ାନ୍‌ତିଙ୍ଗ ମାପ୍
ପୋକ୍‌ତାତାମାନାପ୍ । ଖାନିଙ୍ଗ ଗାଦି ଦେବେଙ୍ଗ ପରିକା କିଜି
ଖାନିଙ୍ଗ ବିସ୍‌ବାସ୍‌ତି ପରିଚୟ୍ ପୋୟ୍‌ତାମାନାପ୍ । ମି ମୁସ୍‌କୁ ଖାନି
ଆଟ୍‌ଞ୍ଜା ମାନିଙ୍ଗ ଖାନ୍ ମିଙ୍ଗ ସାହାଜ୍ୟ କିନି ଉଣିଙ୍ଗ ନାଶ୍ଟ ଖେଡ଼ିକା
ଆତାମାନାନ୍ ।

୨୩ ତିତସଦି ପରିଚୟ ଇକା ଖାନ୍ ନା ଖାଲେମାନିକାନ୍ ମାରି ମିଙ୍ଗି
ସାହାଜ୍ୟ କିନି ଉଣ୍ଡିଙ୍ଗ ନା ଖାଲେ ପାଣିକିନିକାନ୍ । ମାରି ଖାନି ଖାଲେ
ସଲିସମାନି ଆଇ ବିସବାସି ତଡ଼ାନକା ପରିଚୟ ଖାର ମଣ୍ଡୁଲିଆଙ୍ଗି
ଝିନ୍ତୁ ପ୍ରେରିତ ସିସୁ ମାରି କ୍ରିସ୍ତଦି ଗୌରବ୍ ଖାଜା ।

୨୪ ଖାରିଙ୍ଗ ମି ଜିବନ୍ନୋନିକା ତରୁତୁ । ଆତିଙ୍ଗ ଝିନ୍ତୁ ମଣ୍ଡୁଲିଙ୍ଗି
ଇୟା ବିସୟତାନ୍ ସେତାଆନାର୍ ମାରି ମି ଉଣ୍ଡିଙ୍ଗ କିଜିମାନି ଗର୍ବ ସବ୍
ଇଜି ବିସବାସ କିଦେଙ୍ଗ ଆଟ୍ନାର୍ ।



ଆଇ ମଣ୍ଡୁଲିଦୁ ବିସବାସିରି ଉଣ୍ଡିଙ୍ଗ ସାହାଜ୍ୟ

୧ ଜିହୁଦାଦୁ ମାନି ମାପୁରୁଦି ଲୋକାଦି ଲାକୁତୁ ସାହାଜ୍ୟ ପୋକନି
ଉଣ୍ଡିଙ୍ଗ ମିଙ୍ଗି ରାସନିକା ଇନିକା ଦରକାରସିଲେଡ୍ ।

୨ ନାନ୍ତୁ ନେସେନା, ମିର୍ ଝିନ୍ତୁଦିନ୍ ସାହାଜ୍ୟ କିଦେଙ୍ଗ ତିଆର୍
ମାରି ମାସିଦୋନିଆଦି ଲୋକାଦି ଲାକୁତୁ ମି ବିସୟତାନ୍ ନାନ୍ତୁ
ଗର୍ବ କିତାମାନା । ନାନ୍ତୁ ଇର୍ହାମାର୍ହାନ, “ଆକାୟାଦି ତୋଡାନକୁ
ସାହାଜ୍ୟକିନି ଉଣ୍ଡିଙ୍ଗ ଦରତାନ୍ ତିଆରଆତାମାନାର୍ ।” ମି ଝେଡିକା
ଝାରି ମାଡାନକୁ ବା ଏସ ଲୋକାଙ୍ଗ ଜାଗାର୍ତା କିତାମାନାଡ୍ ।

୩ ଇଲେଇ ନାନ୍ତୁ ଇୟା ତଡାନକାଙ୍ଗ ମି ଲାକୁତୁ ପୋକସିନା ।
ସୁତଦୁ, ଇୟା ଝେଡାଦୁ ଏଣ୍ଡେସ୍ ମି ବିସୟତାନ୍ ମା ଗର୍ବ ଆର୍ଏ ଆଏଡ୍
। ନାନ୍ତୁ, ଝେର୍ନି ଇସାବତାନ୍ ମିର୍ ଦାନତି ଖାଲେ ତିଆରଆଜମାନ୍ତୁ
।

୪ ମାସିଦୋନିଆଦି ଲୋକୁ ନା ଖାଲେ ସଲିସି ଜଦି ମିଙ୍ଗି
ତିଆରଆଇମାନିକା ସୁଣାର୍; ଆର୍ଡିଙ୍ଗ ମି ମୁସୁକୁ ଆଟ୍ନା ବିସବାସ୍
ମାନିଙ୍ଗ ମାପୁ ସେମାର୍ଆନାସ୍ ସଡତାନ ଝେର୍ତେଙ୍ଗ ସରିଙ୍ଗ, ଆକା
ମି ଇସାବତାନ୍ ବା ସେମାର୍ଡିକା ଆନାଡ୍ ।

୫ ମିର୍ ମାଟା ସିତିମାନି ଦାନ ଉଣ୍ଡାକିନି ଉଣ୍ଡିଙ୍ଗ ଇୟା ତଡାନକାଙ୍ଗ
ନା ସନି ଆଗଡି ମି ଲାକୁତୁ ପୋକତେଙ୍ଗ ଅନୁରଦ୍ କିତା । ଆରିଙ୍ଗ,
ନାନ୍ତୁ ମି ଲାକୁତୁ ଇନିଖାଲେ ଇୟା ଦାନ୍ ଉଣ୍ଡା କିଜି ଇଡ୍ଜମାନ୍ତୁ ।
ଇୟାମାଡାନକୁ ମିର୍ ଜାସେପେଲାଦାନ୍ ସିଏନ୍‌ଣ୍ଡା ନିଜେଦିବଦାଦାନ୍
ସିଜିନିଦେର୍ ଇଜି ଝେଙ୍ଗିନିଦେର୍ ।

୭ ମୋନତୁ ଇଡ଼ଦୁ, ଆମାଲୋକ୍ ଉଣା ଝିତୁ ଝିତନାନ୍, ଝାନ୍ ଉଣା ପାସି ଉଣ୍ଡାକିନାନ୍, ଯେ ନାଣ୍ଡ ଝିତୁ ଝିତନାନ୍, ଝାନ୍ ନାଣ୍ଡ ପାସି ଉଣ୍ଡାକିନାନ୍ ।

୮ ମାରି, ଯେ ଏଣ୍ଡେସ୍ ଅଡ଼ବିତାମାନାନ୍, ଝାନ୍ ଆୟାଝାଜା ଦାନ କିପିନି ମାରି ଆୟା ଦାନ ଦୁକ୍ତି ମୋନତାନ୍ ଆଏଜି ମାରି କେବଲ୍ ସିନି ନେଗେଡ଼ ମାନାଡ଼ ଇଜି ସିଲେ । ଇରିଙ୍ଗ୍ ଝେଡ଼ିକାଦାନ୍ ସିନି ଲୋକାଙ୍ଗ୍ ମାପୁରୁ ଲାଡ଼ କିନାନ୍ ।

୯ ଝିଜୁ ରକମ୍ତି ଦାନତୁ ମିଙ୍ଗ୍ ପିରିସ୍‌କିଦେଙ୍ଗ୍ ମାପୁରୁ ଆବ୍‌ନାନ୍; ଆବେଣାନ୍ ମିର୍ ଝିଜୁଦିନ୍ ନାଣ୍ଡଦାନ୍ ବାସାଦେଙ୍ଗ୍ ଆଟିନିଦେର୍ ମାରି ଝିଜୁ ରକମ୍ତି ନେଗି ପାଣି ଉଣ୍ଡିଙ୍ଗ୍ ନାଣ୍ଡଦାନ୍ ସିଦେଙ୍ଗ୍ ଆଟିନିଦେର୍ ।

୧୦ ଦର୍ମସାସ୍ତ୍ରଦୁ ରାସାତାମାନାଡ଼,

ସିଲିସାତି ଲୋକାଙ୍ଗ୍ ଝାନ୍ ନିଜେଦିଇଛାଦାନ୍ ଦାନ୍ କିନାନ୍;

ଝାନି ଜିବନ୍‌ନୋନିକା ଝିଜୁଦିନ୍ ମାନାଡ଼ ।

୧୧ ଏମେ ଝିତୁ ଝିତୁଝିତିନିଲୋକାଙ୍ଗ୍ ମାପୁରୁ ଝିଡ଼ିନି ଉଣ୍ଡିଙ୍ଗ୍ ଝିତୁ ମାରି ଉଣ୍ଡେଙ୍ଗ୍ ଇଜି କାଦି ସିନାନ୍, ଝାନ୍ ମି ଦରକାର୍ ଇସାବତାନ୍ ଝିତୁ ଜଗେକିନାନ୍ ମାରି ମି ନିଜେଦି ବଦାଦି ପଲ୍‌ତିଝାଜା ମିର୍ ବା ନାଣ୍ଡ ପାସି ଉଣ୍ଡାକିନିଦେର୍ ।

୧୨ ମିର୍ ଝିଜୁଦିନ୍ ଏଣ୍ଡେସ୍ ନିଜେଦିବଦାଦାନ୍ ଦାନକିଦେଙ୍ଗ୍ ଆଟିନିଦେର୍, ଇୟାଉଣ୍ଡିଙ୍ଗ୍ ମାପୁରୁ ମିଙ୍ଗ୍ ଝିଜୁ ବିସୟତାନ୍ ମାଜନ୍‌କିନାନ୍ ମାରି ମା ମାଡ଼ାନ୍‌କୁ ମିର୍ ପୋକିତିମାନି ଦାନ ଉଣ୍ଡିଙ୍ଗ୍ ନାଣ୍ଡଲୋକ୍ ମାପୁରୁଦିମାନ୍ ମାଡ଼ିସି କିଜି ଦନ୍ୟବାଦ ସିନାନ୍ ।

୧୩ ମି ଦାନସିନି ସେବାଦି ମାଡ଼ାନ୍ କେବଲ୍ ଯେ ମାପୁରୁଦି ଲୋକାଦି ଅବାବ ଉଣା ଆନାଡ଼, ଆକା ସିଲେ, ମାତର ଇୟାମାଡ଼ାନ୍ ମାପୁରୁଦି ଉଣ୍ଡିଙ୍ଗ୍ ନାଣ୍ଡଲୋକା ଜିବନ୍‌ତି ଝେଡ଼ିକା ନିଙ୍ଗ୍‌ଜି ଝାନାଡ଼ ।

୧୪ ଇୟା ସେବାପାଣିଦାନ୍ କ୍ରିସ୍ତଦି ସୁସମାଚାର୍‌ତି ଉଣ୍ଡିଙ୍ଗ୍ ମି ବିସ୍‌ବାସ୍ ଉଣ୍ଡିଙ୍ଗ୍ ମାରି ଝିଜେରି ଝାଲେ ମିସାଜି ମିର୍ ଏମେ ନାଣ୍ଡସିନିକା ତରତିମାନିଦେର୍, ଆୟାଉଣ୍ଡିଙ୍ଗ୍ ଝାର୍ ମାପୁରୁଦି ଦନ୍ୟବାଦ କିନାନ୍ ।

୧୫ ମି ଉଣ୍ଡିଙ୍ଗ୍ ମାପୁରୁଦି ନାଣ୍ଡ ଦୟା ଉଣ୍ଡିଙ୍ଗ୍ ଝାର୍ ନାଣ୍ଡ ଝେଡ଼ିକାଦାନ୍ ପାର୍‌ତନାଦୁ ମିଙ୍ଗ୍ ଏଡ଼କିନାନ୍ ।

୧୫ ରାତ୍ର, ମାପୁରୁଦି ଆର୍ଦ୍ରସିତମାନି ଦାନ ଉଣ୍ଡିଙ୍ଗ୍ ଖାନିଙ୍ଗ୍ ଦନ୍ୟବାଦ୍ କିନାର୍ !

୧୦

କାରାପ୍ ପ୍ରଚାର୍ ବିରୁଦ୍ଧତାନ୍ ପାଉଲ୍‌ତି ଉତ୍ତର୍

୧ ନାନୁ ପାଉଲ୍ ମିଙ୍ଗ୍ ନା ଇୟା ନିଜେଦି ଅନୁରୋଦ ଏନ୍ ଏନ୍ ଇନାର୍, “ନାନୁ ମି ଲାକୁତୁ ମାରିଈଖାଲେ ନାଣ୍ତ ଦାମ୍ବୁ ନି ତିର୍, ମାତର୍ ଆକ୍ ସରିଙ୍ଗା ନାଣ୍ତଆର୍‌ଝା ।” କ୍ରିସ୍ତଦି ନମ୍ରତା ମାରି କାମ୍ବୁ ସିଜି ନାନୁ ମିଙ୍ଗ୍ ଅନୁରୋଦ କିଜି ଖେରିସିନା ।

୨ ମି ଖାଲେ ବେଟେଗାର୍ ଆତିଖାଲେ ନାଙ୍ଗି ଏଣ୍ଡେସ୍ ସାସ୍ତି ବ୍ୟବହାର୍ କିଦେଙ୍ଗ୍ ଆଏତେ । ଇରିଙ୍ଗ୍ ଏମେକାର୍ ଅଡ୍‌ବିନାର୍ ଯେ, ମାପୁ ଦୁନିଆଦି ପାଣି ଇସାବ୍‌ତାନ୍ ବୁଲାନାର୍, ଖାରି ବିରୁଦ୍ଧତାନ୍ ଆର୍‌ଝା ମାଟା ଅନି ନାଣ୍ତ ସାସ୍ ନାଙ୍ଗି ମାନାଡ୍ ।

୩ ମାଡ୍ ଇୟା ଦୁନିଆଦୁ ବାସାକିଜିନିକା ସଡ୍, ମାତର୍ ଇନି ଦୁନିଆଦି ଉଦେସ୍ ଇଡ୍‌ଜି ଜୁଞ୍ଜ କିଏଜିନିକା ।

୪ ମାତର୍ ମାପୁରୁଦି ସାକ୍ତିଦି ସାସାପାତି ବ୍ୟବହାର୍ କିଜି ଆରୁଝା ମୁଣ୍ଡେଙ୍ଗ୍‌ଝି ନାସ୍ତୁକିଜିମାନିକା, ମିଡ୍‌ତି ଜୁକ୍ତିଦିମାଟେଙ୍ଗ୍ ମାପ୍ ନାସ୍ତୁ କିନାପ୍

୫ ମାପୁରୁଦି ବୁଦ୍‌ଦିଙ୍ଗ୍ ବିରୁଦ୍‌କିନି ଝିଜେରେ ଝିଜୁ ବନ୍ଦନଦିଙ୍ଗ୍ ମାପୁ କୁଡ୍‌ନାପ୍ ମାରି ଲୋକୁଦି ଝିଜୁ ଚିନ୍ତା ଆଡ୍‌ଗି ଆଜି କ୍ରିସ୍ତଦି ମାଟାମାନାନେ ।

୬ ମିର୍ ପୁରାଦାନ୍ କ୍ରିସ୍ତଦି ତରିଟିକାନ୍ ମାନାନିକା ଝେନେକା ମି ମାଡାନ୍ ମାରି ଇନି ମାନାଇକା ତରିଟିଙ୍ଗା, ତାନି ଖାଲେ ଦଣ୍ଡୁ ସିଦେଙ୍ଗ୍ ମାପୁ ତିଆରମାନାପ୍ ।

୭ ମି ସାରିବେଡ୍‌ତି ଇନିକା ଝିଜୁ ଗଟେଆଜିନାଡ୍, ସୁଡ୍‌ଦୁ । ମି ମାଡାନ୍‌କୁ ଏନ୍ କ୍ରିସ୍ତଦି ଝେନେକା ମାନାର୍ ନୋ ? ଜଦି ମାନାର୍, ଆର୍‌ତିଙ୍ଗ୍ ଖାନ୍ ମାରି ଅରସ୍ତୁ ଚିନ୍ତାକିଜି ସୁଡ୍‌ନ୍ । ଇରିଙ୍ଗ୍ ଖାନି ଖାଜା ମାଡ୍ ବା କ୍ରିସ୍ତଦି ଝେନେକା ବୁଲାନିକାର୍ ।

୮ ମିଙ୍ଗୁ ନାସ୍ତୁ କିଦେଙ୍ଗ ସିଲେ, ମାତର ତିଆର୍ କିଦେଙ୍ଗ ମାପୁରୁ
ମାଙ୍ଗୁ ଏମେ ଅଦିକାର୍ ସିତାମାନାନ୍, ଆୟାଉଣ୍ଡିଙ୍ଗ ଜଦି ନାନ୍ନୁ ନାଣ୍ଡ
ଗର୍ବ କିତାମାନା, ଆରତିଙ୍ଗ ସେମାର୍ ଆଏ ।

୯ ନା ସିଟିଦାନ୍ ମିଙ୍ଗୁ ତିଲିସି କିନି ଉଣ୍ଡିଙ୍ଗ ଚେଷ୍ଟାକିଏ ନା ବଦା
ସିଲେଡ୍ ।

୧୦ ଏନ୍ ଏନ୍ ଇନାର୍, “ପାଉଲଦି ସିଟିଝିନ୍ନୁ ନାଣ୍ଡତାର୍ ନି ଆଟ୍‌ଝା
ମାତର ମା ଲାକୁଡୁ ମାରିଇଝାଲେ ଝାନି ମେନ୍‌ଲ ଦୁର୍ବଲ ତରିତାଡ୍
ମାରି ଝାନି ବଲୁ ପାଣିସିଲିକା ଝାଜାଆତାଡ୍ ।”

୧୧ ଆୟା ଲୋକ୍ ବୁଜାନିକା ମାନାଡ୍ ଜେ, ମାପୁ ଆକରାନ୍ ସିଟିଦୁ
ଏମେକା ରାସ୍‌ନାପ୍, ଲାକ୍‌ଡୁ ମାନିଝାଲେ ତାନିଙ୍ଗ ପାଣିଦୁ କିନା
ତରନାପ୍ ।

୧୨ ଏଣ୍ଡେସ୍‌ବା ନିଜେଦିଙ୍ଗ ପେରିକାନ୍ ଇଜି ଅଡ୍‌ବିନି ଲୋକାଦି
ଦାଡି ଆନି ଉଣ୍ଡିଙ୍ଗ ବା ଝାରିଝାଲେ ନିଜେଙ୍ଗ ତୁସ୍‌ତେଙ୍ଗ ସାହାସ୍ ମାଦି
ସିଲେଡ୍ । ଝାର୍ ଏସ ବୁଦିସିଲିକାର୍, ଇରିଙ୍ଗ ଝାର୍ ନିଜେଦିଙ୍ଗ ନିଜେ
ଝାଲେ ଇସାବ୍ କିନାର୍, ନିଜେ ଲେକିସ୍‌କିନି ବାଡିଗାଦାନ୍ ନିଜେନିଜେ
ବିଚାର୍ କିଆୟାଆନାର୍ ।

୧୩ ମାତର ମା ଗର୍ବ ଉଣା । ମାପୁରୁ ମା ଉଣ୍ଡିଙ୍ଗ ଏମେ ପାଣିବାଡି
ଟିକ୍ କିତାମାନାନ୍, ତାନି ମାଡାନ୍‌କୁ ମାପୁ ଗର୍ବ କିଜିନାପ୍ । ଆୟା
ପାଣିବାଡିଦି ଲଇ ମିର୍ ମିସାତିମାନିଦେର୍ ।

୧୪ ଆୟାଉଣ୍ଡିଙ୍ଗ ମାପୁ ଆଗିଡିରାନ୍ କ୍ରିସ୍‌ଦି ସୁସମାଚାର୍ ମି ଲାକୁଡୁ
ଅସି ଝାନିବେଡାଦୁ ଇନିକା ଏରିଆ ଆଡ୍‌ରେ ପାଣି କିଏପ୍ ।

୧୫ ମାପୁରୁ ପାଣିକିତିମାନି ମା ପାଣିଜାଗାଦୁ ପାଣିକିନି ଆଡ୍‌ରେ
ଆଇଝାରି ପାଣିଦୁ ସୁଜୋଗ ଅସି ଗର୍ବ କିଏପ୍ । ମାତର ମାପୁ ଆସା
କିଜିନାପ୍ ଜେ, ମିର୍ ବିସ୍‌ବାସ୍‌ଦୁ ପିରିଜିମାନି ସାଙ୍ଗେ ସାଙ୍ଗେ ମିଙ୍ଗୁ
ମାଡାନ୍‌କୁ ମା ପାଣିଝିନ୍ନୁ ମାରି ଝେଙ୍ଗନାଡ୍ । ମାତର ଇକା ମାପୁରୁ
କିତିମାନି ନିୟମ୍ ମାଟା ଅମାନ୍ୟ କିମାର୍ ।

୧୬ ଆକାଆତିଙ୍ଗ ଆଇଝାରି ପାଣିଜାଗାଦୁ ଆଜିମାନି ପାଣି ଉଣ୍ଡିଙ୍ଗ
ଗର୍ବ କିଏଜି ମି ଅଡ୍‌ବିନି ଆଡ୍‌ରେ ଆଇଦେସ୍‌ତି ଝାରିଙ୍ଗ ବା ମାଡ୍
ସୁସମାଚାର୍‌ତି ପ୍ରଚାର୍ କିଦେଙ୍ଗ ଆଟିନିକା ।

୧୭ ବ୍ୟବସ୍ଥାଦୁ ରାସାତାମାନାଡ଼, “ଏନ୍ ଗର୍ବ କିଦେଙ୍ଗ ଇଚାକିନାନ୍,
 ଖାନ୍ ପ୍ରବୁଦି ପାଣି ଉଣ୍ଡିଙ୍ଗ ଗର୍ବ କିପିନ୍ ।”

୧୮ ମାତର, ନିଜେଦିଙ୍ଗ ପ୍ରସଂସା ମାଣାନ୍ ଏନ୍ ପରିକାଦୁ ଜିଣାଏନ୍,
 ପ୍ରବୁଦି ତରିନ୍ ନେଗିକାନ୍, ଆୟାକାନ୍ କେବଲ ଖାନ୍ ଗ୍ରହଣଜଗ୍ୟ ।

୧୧

ପାଉଲ ନି ବାଣ୍ଟା ବାବବାଦିର୍

୧ ନାନ୍ ଅଡ଼ବିନା, ଇନି ବିସୟତିଙ୍ଗ ଅଡ଼ପ ବୁଲ୍ ଆତିଙ୍ଗବା ମିର୍
 ନାଙ୍ଗ୍ ସାସକିନିଦେର୍ ।

୨ ମି ବିସୟତାନ୍ ଉନ୍ତ୍ର ସାକ୍ତିଦି ରିସାଆନିକା ନା ମୋନ୍ତୁ ମାନାଡ଼
 । ଇରିଙ୍ଗ ମିର୍ ପବିତ୍ର ରିପାଆଇଲି ଖାଜା । ଅରେନ୍ନେମାତର୍
 କାନ୍ୟାମୁରୁଲି କ୍ରିସ୍ତଦି ଖାଲେ ମି ମିସାକିନି ସିନି ଉଣ୍ଡିଙ୍ଗ ନାନ୍ ପାର୍ଯ୍ୟାଣ
 କିତାମାନା ।

୩ ନାଙ୍ଗ୍ ତିଏଲ୍‌ଖାଜିନାଡ଼, ସାରାସ୍ତି ସାଲ୍‌କିଦାନ୍ ହବା ଏଣ୍ଡେସ୍
 ବାୟାଆତି ଖାଜା ମିର୍ ଏଣ୍ଡେସାତିଙ୍ଗ କ୍ରିସ୍ତଦି ଉଣ୍ଡିଙ୍ଗ ମି ସାକ୍ତି ମାରି
 ପବିତ୍ର ବିସ୍ବାସ୍ତାନ୍ ଖେର୍ସ ଆନିଦେର୍ ।

୪ ଇରିଙ୍ଗ ଏନ୍ ଜଦି ଖାଜି ମାଡୁ ପ୍ରଚାର କିତିମାନି ଜିସୁଙ୍ଗ୍ ତ୍ରିସ୍ତି
 ଆଇ ଇନି ଜିସୁଦି ମାଟା ପ୍ରଚାର କିନାର ବା ମିର୍ ପୟତିମାନି ପବିତ୍ର
 ଆମ୍ବାଦିଙ୍ଗ ତ୍ରିସ୍ତିଆଇ ଏମେ ଆମ୍ବାଦି ମାଟା ଖେର୍ନାର ମାରି ମିର୍
 ମାନାତିମାନି ସୁସମାଚାରତିଙ୍ଗ ତ୍ରିସ୍ତିଆଇ ଇନି ସୁସମାଚାର ପ୍ରଚାର
 କିନାର, ମିର୍ ପୁରା ମାନାତିମାନିଦେର୍ ।

୫ ମି ଆୟା ଝିଜେରିଙ୍ଗପେରି “ପ୍ରେରିତ ସିସୁରି” ମାଣ୍‌କୁ ନାନ୍ ଇନି
 ଗୁଣ୍ଡୁ ଇସ୍ତିକିନ୍ଦା ଇଜି ଅଡ଼ବିଏ ।

୬ ନାନ୍ ଖାରି ଖାଜା ସାଲ୍‌କିଦିକାନ୍ ଆଦେଙ୍ଗ ଆବ୍‌ଏ, ମାତର୍
 ବୁଦିଦୁ ଉଣା ସିଲେ । ମିଙ୍ଗ୍ ଇୟା ମାଟା ମାପ୍ ଝିଜୁଦିନ୍ ମାରି ଝିଜୁ
 ଅସୁବିଦାଦୁ ଖେର୍ସି ଖାଜିନାପ୍ ।

୭ ମାପୁରୁଦି ସୁସମାଚାର ପ୍ରଚାର କିତିଖାଲେ ନାନ୍ ମିମାଣ୍‌କୁ
 ମୁସ୍‌କୁପେରାନି ଉଣ୍ଡିଙ୍ଗ ନାନ୍ ନିଜେଦିଙ୍ଗ ଆଡ଼ଗି କିତାମାନା । ଇକା
 ଇନିକା ନା ବୁଲ୍ ?

୮ ମି ଲୋଇ ପାଣି କିତିଖାଲେ ନାନ୍ ଆଇ ମଣ୍ଡଲିଙ୍ଗାମାଣୁକୁ ଡାବୁଙ୍ଗ
ସାହାଜ୍ୟ ପୟତାମାନା । ଝେରତେଙ୍ଗ ସରିଙ୍ଗ, ମି ନେଗି ଉଣ୍ଡିଙ୍ଗ ନାନ୍
ଝାରିଙ୍ଗ ଡଙ୍ଗା କିତାମାନା ।

୯ ☆ମି ଝାଲେ ମାରିଇଝାଲେ ନା ଅବାବ ପୁରାକିନି ଉଣ୍ଡିଙ୍ଗ ନାନ୍
ଏଙ୍ଗବା ବନ୍ଧୁତିଗ୍‌ଦେଙ୍ଗ ସିଏ । ଇରିଙ୍ଗ ମାସିଦୋନିଆଦାନ୍ ଝାତିମାନି
ତଡାନ୍‌କୁ ନା ଝିନ୍ଦୁ ଅବାବ ପୁରା କିତାମାହାର । ସରଇଦିନ୍‌ତି ଝାଜା
ବବିସ୍ୟତରେ ବା ନାନ୍ ଏସକାଙ୍ଗ ମିଙ୍ଗ ବନ୍ଧୁତିଗ୍‌ଏ ।

୧୦ ନା ଜିବନ୍‌ତୁ ମାନି କ୍ରିସ୍ତଦି ସତ୍‌ତିଙ୍ଗ ସାକି ସିଜି ନାନ୍ ପାରମାଣ୍
କିଜି ଝେରସିନା ଜେ, ଆକାୟା ରାଜିଦି ଆମା ରାଜିଆଙ୍ଗା ନା ଇୟା
ଗର୍ବଦିଙ୍ଗ ଏନ୍ ନାସ୍ତୁ କିଦେଙ୍ଗ ଆବ୍‌ଏନ୍ ।

୧୧ ନାନ୍ ଇନିଦାନିଙ୍ଗ ଇୟାଝାଜା ଇଜିନା ? ନାନ୍ ଇନିକା ମିଙ୍ଗ
ଜିବନ୍‌ନୋଏ ? ମାପୁରୁ ନେସ୍‌ନାନ୍, ମିଙ୍ଗ ନାନ୍ ଏସଜିବନ୍‌ନୋନା ।

୧୨ ମାତର୍ ଇଲେ ନାନ୍ ଆମାକା କିଜିନା, ଆକା କିଜିମାନା ।
ଆରତିଙ୍ଗ, ମା ଝାଜା ପାଣି କିଜିନିଦେର୍ ଇଜି ଆଇ “ପେରିଡ୍‌ର୍” ଗର୍ବ
କିନାର୍, ଝାର୍ ମାରି ଆକା କିଦେଙ୍ଗ ଆବ୍‌ଏର୍ ।

୧୩ ଝାର୍ ସତ୍‌ତି ପ୍ରେରିତ ସିସୁର୍ ଆଏର୍, ଝାର୍ ଝିଜେରେ
ଟକେକିନିକାର୍, ଝାର୍ ନିଜେଦି ପାଣି ବିସୟତାନ୍ ମିର୍ ଇନାର୍ ମାରି
କ୍ରିସ୍ତଦି ପ୍ରେରିତ ସିସୁ ଝାଜା ତରାନି ଉଣ୍ଡିଙ୍ଗ ରୁପ୍ ବାଦ୍‌ଲେକିନାର୍ ।

୧୪ ମାରି ଇକା କାବାଆନିକା ଇନିକା ସିଲେଡ୍, ମାତର୍ ସୟତାନ୍
ବା ଜାୟତି ମୁସକୁପୁରତି ଦୁଡ୍‌କା ଝାଜା ତରାନି ଉଣ୍ଡିଙ୍ଗ ରୁପ୍
ବାଦ୍‌ଲେକିନାଡ୍ ।

୧୫ ଆଦେଙ୍ଗ ଝାନି ଦାସକୁ ଦାମ୍‌ଦି ସେବାକିନିଝାନି ରୁପ୍ ଆସତାର୍,
କାବାଆନିକା ଇନିକା ସିଲେଡ୍, ମାତର୍ ସାରାସାରିଝେନ୍‌କା ଝାର୍
କିତିମାନି ପାଣିଦି ଇସାବ୍‌ତାନ୍ ଦଣ୍ଡ ଝାର୍ ପୟନାର୍ ।

ପାଉଲଦି ଦୁକ୍‌ବଗାନିକା ସିସୁ ଝାଜା

୧୬ ନାନ୍ ମାରିଡେସି ଇଜିନା, ଏନ୍ ଏଣ୍ଡେସ୍ ନାଙ୍ଗ ବୁଦିସିଲିକାନ୍
ଇଜି ଅଡ୍‌ବିମାକିନ୍ । ଜଦି ଆୟାଝାଜା ଅଡ୍‌ବିନା,

ଆରତିଙ୍ଗ ନାଙ୍ଗ ବୁଦିସିଲିକାନ୍ ଖାଜା ମାନାଦୁ, ଆରତିଙ୍ଗ ନାନ୍
ବା ଅଡ଼ପ ଗର୍ବ କିଦେଙ୍ଗ ଉନ୍ଦ୍ରୁ ସୁଜୋଗ୍ ପୟନା ।

୧୭ ମାରିବା ଇଲେ ନାନ୍ ଆମାକା ଇଜିନା, ଆୟାଉଣ୍ଡିଙ୍ଗ ପ୍ରବୁ
ନାଙ୍ଗ ଆଦେସ୍ ସିଏନ୍ । ଇରିଙ୍ଗ ଗର୍ବ କିନି ବିସୟତାନ୍ ନାନ୍
ସଡ଼ତାନ୍ ବୁଦିସିଲି ଖାଜା ଖାରଗିଜିନା ।

୧୮ ମାତର୍ ବୁନିଆଦି ବିସୟତାନ୍ ନାଣ୍ଡଲୋକ୍ ଏଣ୍ଡେସ୍ ଗର୍ବ କିନାର୍,
ନାନ୍ ବା ଆୟାଖାଜା କିଦେଙ୍ଗ ଆଟନା ।

୧୯ ମିର୍ ବୁଦିଆଜି ବା ଖେଡ଼ିକାଦାନ୍ ବୁଦିସିଲିଖାରିଙ୍ଗ୍ ସାସ୍
କିଜିନିଦେର୍ ।

୨୦ ଜଦି ଏନ୍ ମି ମୁସ୍କୁ ଅଦିକାର୍ କିଜି ସାକର୍ କିତିଙ୍ଗ୍, ମି ଓଜୁ
ଦନସମ୍ପତି ଆସତିଙ୍ଗ୍, ମିଙ୍ଗ୍ ଉରିଦୁ ପକ୍ତିଙ୍ଗ୍, ମିଙ୍ଗ୍ କାଡ଼ିତିଙ୍ଗ୍,
ଇୟାଖାଜା ଜେ ମି ବୁଗୁଲିଦୁ ସାପୁଡ଼ା ଡାକ୍ତିଙ୍ଗ୍ ବା ମିର୍ ଆକା
ସାସ୍ କିଜିନିଦେର୍ ।

୨୧ ନାନ୍ ସେମାରତି ଖାଲେ ମାନାଜିନା ଜେ, ଇୟାଓଜୁ ବିସୟଦୁ
ନାନ୍ ନାଣ୍ଡ ଦୁର୍ବଲମାନା ।

ମାତର୍ ଆଇ ଇନି ବିସୟଦୁ ଏନ୍ ଜଦି ଗର୍ବ କିଦେଙ୍ଗ୍ ସାହାସ୍
କିନାନ୍, ଆରତିଙ୍ଗ୍ ମୁର୍କୁ ଖାଜା ନାନ୍ ଇଜିନା, ନା ଆୟାଖାଜା ସାହାସ୍
ମାନାଡ଼ ।

୨୨ ଖାର ଇନିକା ଏବ୍ରିୟ ? ନାନ୍ ବା ଏବ୍ରିୟ । ଖାର ଇନିକା
ଇସ୍ରାଏଲିୟ ? ନାନ୍ ବା ଇସ୍ରାଏଲିୟ । ଖାର ଇନିକା ଅବ୍ରାହାମଦି
କୁଟୁମ୍ ? ନାନ୍ ବା ଅବ୍ରାହାମଦି କୁଟୁମ୍ ।

୨୩ ☆ ଖାର ଇନିକା କ୍ରିସ୍ତି ସେବାକିନିକାର୍ ? ନାନ୍ ବାୟାଖାଜା
ଇଜିନା, ନାନ୍ ଖାରିମାଣ୍ଡୁ ଓଜେରିଙ୍ଗ୍ପେରି ସେବାକିନିକିୟା ।
ନାନ୍ ଖାରିମାଣ୍ଡୁ ନାଣ୍ଡ କାସ୍ତୁପାଣି କିତାମାନା, ନାଣ୍ଡ ଜଇଲ୍ଡୁ
ତେବାତାମାନା ମାରି ବାଡ଼ିଗାଦାନ୍ ଡାଟିମାନିକା ସାସ୍ କିତାମାନା
ମାରି ନାଣ୍ଡ ଦେବେଙ୍ଗ୍ ସାନିମାନ୍ ସାମାନ୍ କିତାମାନା ।

୨୪ ନାନ୍ ଜିହୁଦିରିମାଣ୍ଡୁ ପାସ୍ ଦେବେଙ୍ଗ୍ ତିରିସ୍ ନ ଦେବେଙ୍ଗ୍
ବାଡ଼ିଗାଦାନ୍ ମାଡ଼ ତିରାମାନା ।

୨୫ ☆ରୋମିୟରିମାଣୁକୁ ମୁନ୍ତ୍ର ଦେବେଙ୍ଗ କରଡା ମାଡ଼ ପୟତାମାନା । ଉନ୍ତ୍ର ଦେବେଙ୍ଗ କାଲୁକୁ ମାଡ଼ ତିରାମାନା । ମୁନ୍ତ୍ର ଦେବେଙ୍ଗ ଜାହାଜ ଦୁର୍ଗଟଣାଦାନ ସାମାନ କିତାମାନା ମାରି ଉନ୍ତ୍ର ଦେବେଙ୍ଗ ସାମଦୁରୁତି ଏରୁଦୁ କଡ଼େ ନାଲୁଗି ଗଣ୍ଡା ତେବାତାମାନା ।

୨୬ ☆ଗାଦି ଦେବେଙ୍ଗ ସନି ଖାଲେ ଗାଡାଦି ସାନିମାନୁ, ଡଙ୍ଗାରି କିୟୁଦୁ, ଜିହୁଦି ମାରି ଅଣଜିହୁଦିରି କିୟୁଦୁ, ଗାଡ଼ତୁ ମାରି ସୁନ୍ସାନବାଡିତୁ, ସାମଦୁରୁତୁ, ଟକେକିନି ସଙ୍ଗରି ମାଣକୁ ସାନିମାନୁ ସାମନା କିତାମାନା ।

୨୭ ବେସିନାଣୁ ପାଣି କିତାମାନା ମାରି ଦୁକ୍ କାସୁ ବୋଗକିତାମାନାନ୍, ସୁଜୁଏଣ୍ଟା ମାରି ବାଙ୍ଗା, ଏରକିଦାନ ବେସିଦିନ୍ କାଟେ କିତାମାନା, ନେଗି କାଦି, ଆଙ୍ଗା ମାରି ଡରନିବାଡି ସିଲେଡି ଉଣ୍ଡିଙ୍ଗ ବେସି କାସୁ ପୟତାମାନା ।

୨୮ ଇୟାକା ଝିଜୁ ଡିସ୍ତିଙ୍ଗ ଝିଜୁ ମଣ୍ଡଲିଆଙ୍ଗା ଉଣ୍ଡିଙ୍ଗ ନା ଦାଇଡ଼ ଝିଜୁ ଦିନ୍ ପିଣ୍ଡି ବୁଲାଇନା ।

୨୯ ଏନ୍ ଜଦି ଦୁର୍ବଲ ଆନାନ୍, ନାନୁ ବା ଖାନି ଖାଲେ ଦୁର୍ବଲ ଏଡକିନା । ଏନ୍ ପାପ୍ କିଡିଙ୍ଗ, ନାନ୍ ଜିବନ୍ତୁ କାସୁ ଏଡକିନା ।

୩୦ ଜଦି ଗର୍ବ କିଦେଙ୍ଗ ଆନାଡ଼, ଆରଡିଙ୍ଗ ନା ଇୟାଝିଜୁ ଦୁର୍ବଲଦି ଉଣ୍ଡିଙ୍ଗ ନାଙ୍ଗା ଗର୍ବ କିଦେଙ୍ଗ ଆନାଡ଼ ।

୩୧ ପ୍ରବୁ ଜିସୁ କ୍ରିସ୍ତି ବୁବା ମାପୁରୁ ଝିଜୁଦିନ୍ ଦନ୍ୟ ଆପିଡ଼ । ଖାନ୍ ନେସ୍ନାନ୍ ଜେ, ନାନ୍ ମିଡ଼ ଝେରଏଜିନା ।

୩୨ ☆ନାନ୍ ଦାମାସ୍କସ୍ ମାରୁଇଖାଲେ ରାଜା ଆରେଟସ୍ଦି ଅଦିକାରତାନ୍ ସାସନକିନିକାନ୍ ନାଙ୍ଗା ଆସିନି ଉଣ୍ଡିଙ୍ଗ ଗାଡ଼ଡ଼ି ଝିଜୁତରିନ୍ ସନ୍ୟରିଙ୍ଗ କାପ୍‌କିବିସ୍ କିତାମାର୍ହାନ୍ ।

୩୩ ମାଡ଼ର ନାଙ୍ଗା ସାଟ୍‌ନାଦି ସାହାଜ୍ୟଦାନ୍ ଜରକା ସାରି ଗାଡ଼ଡ଼ି ଗଡା ଆଡ଼ରେ ରେପ୍‌ତା ମାର୍ହାର୍ । ଇୟାଝାଜା ଇସାବ୍‌ତାନ୍ ନାନ୍ ଆୟା ସାସନକିନିଖାନି ମାଣକୁ ରକ୍‌ୟା ପୟତାମାର୍‌ଆ ।

☆ ୧୧:୨୫ ପ୍ରେରିତ ୧୭:୨୨ପ୍ରେରିତ ୧୪:୧୯. ☆ ୧୧:୨୬ ପ୍ରେରିତ ୯:୨୩ପ୍ରେରିତ ୧୪:୫.

☆ ୧୧:୩୨ ପ୍ରେରିତ ୯:୨୩-୨୫.

୧୨

ପାଉଲଟି ତରାୟଆନିକା

୧ ଭନିକା ଲାବ୍ ଆଏତିଙ୍ଗ୍ ବା ନାଙ୍ଗ୍ ଏଣ୍ଡେସ୍ ବା ଗର୍ବ କିଦେଙ୍ଗ୍ ଆନାଡ୍ । ମାତର୍ ପ୍ରବୁ ନାଙ୍ଗ୍ ଏମେ ଝିନ୍ନୁ ଦର୍ସନ ମାରି ତରତା ସିତାମାନାନ୍, ଆୟାଝିନ୍ନୁ ଇଲେଇ ନାନୁ ଇନା ।

୨ କ୍ରିସ୍ତଦିମାନୁ ମାନି ଅରେନ ଲୋକ୍ ସତଦ ବାସେକ୍ ଆଗ୍ତି ମୁନ୍ତ୍ରିପୁରତୁ ସର୍ହାମାର୍ହାନ୍ ଝାନ୍ ନିଜେଦି ମେନ୍ଦଲ୍ତାନ୍ ସର୍ହାମାର୍ହାନ୍ ବା ଲବ୍ ସୁଡ଼ତୁମାର୍ହାନ୍, ନାନୁ ନେସେଏ, ଆକା କେବଲ୍ ମାପୁରୁ ନେସ୍ନାନ୍ ।

୩ ନାନୁ ନେସ୍ନା, ଝାନିଙ୍ଗ୍ ମୁସ୍କୁପୁରତି ତତିତୁ ଅଆୟାତାମାର୍ହାଡ୍ ଝାନ୍ ମେନ୍ଦଲ୍ତୁ ମାର୍ହାନ୍ ନୋ ମେନ୍ଦଲ୍ ଆଡ୍ରେ ମାର୍ହାନ୍, ନାନୁ ନେସେଏ, କେବଲ୍ ମାପୁରୁନେ ନେସ୍ନାନ୍ ।

୪ ଆବେନ୍ ଝାନ୍ ମାଟାତୁ ଇନ୍ଏଣ୍ଡା ମାରି ବଲ୍ କିଦେଙ୍ଗ୍ ଆଟ୍ନିନାନି ମାଟା ଝେନ୍ଡେଙ୍ଗ୍ ଆଟ୍ତାମାର୍ହାନ୍ ।

୫ ଇୟା ଲୋକ୍ତି ଉଣ୍ଡିଙ୍ଗ୍ ନାନୁ ଗର୍ବ କିନା । ମାତର୍ ନିଜେଦି ସାକ୍ତିସିଲିକା ଡିସ୍ତିଙ୍ଗ୍ ଆଇ ଇନି ବିସୟତୁ ନାନୁ ଗର୍ବ କିହେ ।

୬ ଗର୍ବ କିନିକା ନା ମାଡାନ୍କୁ ମୁର୍କ୍ ଆଏଡ୍, ଇରିଙ୍ଗ୍ ନାନୁ ସଡ୍ ମାଟା ଇନା । ମାତର୍ ନାନୁ ଗର୍ବ କିଏଜିନା, ଇରିଙ୍ଗ୍ ନାନୁ ବଦାକିନା, ଲୋକୁ ନାଙ୍ଗ୍ ଏଣ୍ଡେସ୍ ପାଣି କିନିକା ସୁଣାରୁ ବା ନା ମାଡାନ୍କୁ ଏଣ୍ଡେସ୍ ମାଟା ଝେନାର୍, ଝାନି ମାଡାନ୍କୁ ନାଙ୍ଗ୍ ପେରିକାନ୍ ଇଜି ମନ୍ତୁ ଇନ୍ମାକିର୍ ।

୭ ଇୟା ଇସ୍ତି ପୁନା ତରାନିକା ଲାବ୍କିଜି ନାନୁ ଏଣ୍ଡେସ୍ ଆକାର୍ ଆଏ, ଇୟାଉଣ୍ଡିଙ୍ଗ୍ ନା ମେନ୍ଦଲ୍ତୁ ଉଣ୍ଡି ନି ନୋପି ସିଆୟ୍ ଆତାମାନାନ୍, ଇକା ନାଙ୍ଗ୍ ଗର୍ବ ଆଇ ଉଣ୍ଡିଙ୍ଗ୍ ସୟତାନ୍ଦି ଦୁଡ୍ ଝାଜା ପାଣିକିନାମାନାଡ୍ ।

୮ ଇବେଟ୍କୁ ଆକ କିଦେଙ୍ଗ୍ ନାନୁ ପ୍ରବୁଦି ଲାକୁତୁ ମୁଜା ପାରତନା ଅନୁରୋଦ କିତାମାନା ।

୯ ମାତର୍ ଝାନ୍ ନାଙ୍ଗ୍ ଇର୍ହାନ୍, “ନା ଦୟା ନି ଉଣ୍ଡିଙ୍ଗ୍ ନାଣ୍ଡ, ନିନ୍ନୁ ସାକ୍ତିସିଲିଖାଲେ ନା ସାକ୍ତି ପୁରା ଦାନ୍ ତରାୟ ଆନାଡ୍ ।” ଆଦେଙ୍ଗ୍

କ୍ରିସ୍ତଦି ସାକ୍ତି ନା ମାନୁ ବାସାନି ଉଣ୍ଡିଙ୍ଗ ନାନୁ ନା ସାକ୍ତିସିଲି ଉଣ୍ଡିଙ୍ଗ ନାଣ୍ଡ
ଗର୍ବ କିନା ମାରି ଝେଡ଼ିକା ଆନା ।

୧୦ ମାରି କ୍ରିସ୍ତଦି ଉଣ୍ଡିଙ୍ଗ ଝିନ୍ତୁ ରକମ୍ପତି ସାକ୍ତିସିଲିକା, ଅପମାନ,
କାଷ୍ଟୁ ତାଡ଼ନା, ମାରି ସାନିଜିନିକା ନାନୁ ଝେଡ଼ିକାଦାନିନା, ଇରିଙ୍ଗ
ଏସ୍ତ୍ରାଲେ ନାନୁ ସାକିସିଲେ, ନାସ୍ତ୍ରାଲେ ନାନୁ ବପୁଦିକାନ ।

ପାଉଲ କବିତ୍ବି ବିସ୍ବାସରି ସିନ୍ତା କିତାନ

୧୧ ନାନୁ ବୁଦିସିଲି ଖାଜା ବ୍ୟବହାର କିଜିନା । ଇକା କିନି ଉଣ୍ଡିଙ୍ଗ
ମିର୍ ନାଙ୍ଗି ଜାସେପେଲା କିତିମାନିଦେର୍, ମାତର ନା ପ୍ରସଂସା କିନିକା
ମିଟିକ ମାର୍ହାତ୍ । ନାନୁ ଇନିକା ଆଏତିଙ୍ଗ ବା ମିଆୟା ପେରି “ପ୍ରେରିତ
ସିସୁରି” ମାଣ୍ଡକୁ ଇନି ଗୁଣ୍ଡତାନ ଇସ୍ତ୍ରିକାନ ଆଏ ।

୧୨ ମି ଲୋଇ ସାସ୍ତାନ ନାଣ୍ଡ କାବାଆନି ପାଣି ପୁରାକିଜି ନାଣ୍ଡ
କାବାଆନି ବିସୟତାନ ନାନୁ ଯେ ସତେନେ ଅରେନ୍ ପ୍ରେରିତ ସିସୁ,
ତେନି ପାରମାଣ୍ଡ ସିତାମାନା ।

୧୩ କେବଲ ଉଣ୍ଡି ବିସୟତୁ ଆଇ ମାଣ୍ଡଲିମାଣ୍ଡକୁ ମି ଖାଲେ ନାନୁ
ମିଙ୍ଗି ତାରୁଙ୍ଗ ଲସ୍ତନି ଉଣ୍ଡିଙ୍ଗ ବଜୁ ଖାଜା ଆଏ । ଜଦି ଇକା ମି
ଉଣ୍ଡିଙ୍ଗ ନା ତାଗଇ ଜିବନ୍ତି ବ୍ୟବହାର, ଆର୍ତିଙ୍ଗ ଇୟାଉଣ୍ଡିଙ୍ଗ
ନାଙ୍ଗି ଦୟାକିଜି କେମା କିତୁ ।

୧୪ ମୁଣ୍ଡି ଦେବେଙ୍ଗ ଉଣ୍ଡିଙ୍ଗ ମି ଲାକୁତୁ ସନି ଉଣ୍ଡିଙ୍ଗ ନାନୁ ତିଆର୍
ଆଜିନା । ନାନୁ ମି ମାଡାନକୁ ଇନି ବିସୟ ଦାବି କିଏ । ନାନୁ ମିଙ୍ଗି
ଇଛାକିନା । ମି ଦନସମ୍ପତି ସିଲେ । ଇରିଙ୍ଗ ବୁବା ଯାୟାରି ଉଣ୍ଡିଙ୍ଗ
କଡକକରା ଉଣ୍ଡା କିଏର୍, ବୁବା ଯାୟା କଡକକ୍ରାରି ଉଣ୍ଡିଙ୍ଗ ଦନ୍
ଉଣ୍ଡାକିନିକା ମାନାତ୍ ।

୧୫ ମିଙ୍ଗି ସାହାଜ୍ୟ କିନି ଉଣ୍ଡିଙ୍ଗ ନା ଝିନ୍ତୁ, ଇୟାଖାଜାକି
ନିଜେଦିଙ୍ଗ ଝେଡ଼ିକାଦାନୁ ସର୍ପେ କିନିସିନି ଉଣ୍ଡିଙ୍ଗ ନାନୁ ତିଆର୍
ଆତାମାନା । ନାନୁ ମିଙ୍ଗି ନାଣ୍ଡ ଜିବନ୍ନୋଜିନା ଇଜି ମିର୍ ଇନିକା
ନାଙ୍ଗି ନିସ ଉଣା ଜିବନ୍ନୋଜିନିଦେର୍ ?

୧୬ ନାନୁ ମି ମୁସକୁ ବଜୁଦି ଖାଜା ଆଏ । ଇୟା ବଜୁ ମିର୍ ସତେନେ
ମାନାନିଦେର୍ । ମାତର୍ ମି ମାଣ୍ଡକୁ ଏନ୍ ଝେର୍ତେଙ୍ଗ ଆଟନାନ, ନାନୁ
ସାଲାକି ଆତିମାନିଙ୍ଗ ମିର୍ ଝେରିସି ମିଙ୍ଗି ଉରିତୁ ପୋକ୍ତାମାନାନ
।

୧୭ ମି ଲାକ୍ଷ୍ମୀ ଏମେଝାରିଙ୍ଗ ପୋକ୍ତାମାନା, ଝାରିମାଣୁକୁ ବା ଏମାଣୁକୁ ନାନୁ ଇନିକା ମିମାଣୁକୁ ଇନି ସୁବିଦା ରେଲିଜିଅତାମାନା ?

୧୮ ମି ଲାକ୍ଷ୍ମୀ ସନିଉଣ୍ଡିଙ୍ଗ ନାନୁ ତିତସଦିଙ୍ଗ ଅନୁରୋଦ କିତା ମାରି ଝାନିଝାଲେ ଆଇ ତଡ଼ାନ୍‌କାଙ୍ଗ ପୋକ୍ତା । ତିତସ ମି ଲୋଇରାନ୍ ଇନି ସୁବିଦା ପୟତାମାନାନ୍ ଇଜି ଏନ୍ ଇନ୍‌ଡ୍ରେଙ୍ଗ ଆଟ୍‌ନାନ୍ ? ଝାନ୍ ମାରି ନାନୁ ଇନିକା ସାମାନ୍ ପାଣି ଅସି ମି ଝାଲେ ସାମାନ୍ ବ୍ୟବହାର କିଏ ନୋ ?

୧୯ ଏଣ୍ଡେସାତିଙ୍ଗ ମିର୍ ଅଡ଼ବିଜିନିଦେର୍ ଜେ, ଇୟାସାନ୍ଦି ମାପୁ କେବଲ ନିଜେଦିକା ନର୍ଜି ସିଜି ଝାତାମାନାପ୍ ନୋ ! ମାପୁରୁଦି ଆଗଡ଼ି କ୍ରିସ୍ତ ମାଙ୍ଗ୍ ଇର୍ଇ ଝାଜା ମାପ୍ ମିଙ୍ଗ୍ ଇଜିନାପ୍ । ଲାଡ଼ତି ତଡ଼କୁ, ମାପୁ ଏମେକା କିଜିନାପ୍ ଆକା କେବଲ ମି ନେଗି ଉଣ୍ଡିଙ୍ଗ କିଜିନାପ୍ ।

୨୦ ଇରିଙ୍ଗ ନାନୁ ତିଏଲ୍ ଝାଜିନାଡ଼, ନାନୁ ମି ଲାକ୍ଷ୍ମୀ ଝାଜି ମିଙ୍ଗ୍ ଏଣ୍ଡେସ ସୁଡ଼ୁଦେଙ୍ଗ ବଦା କିଜିନା, ଆୟାଝାଜା ସୁଡ଼ୁଦେଙ୍ଗ ଆଟ୍‌ଏ ମାରି ମିର୍ ନା ଆମା ରୁପ୍ ସୁଡ଼ୁଦେଙ୍ଗ ବଦା କିଇଜିନିଦେର୍, ଆରଡିଙ୍ଗ ଆକା ସୁଡ଼ୁଦେଙ୍ଗ ଆଟ୍‌ନିଦେର୍ । ଆରଡିଙ୍ଗ ଆବେନ୍ ସଲସି ନାନୁ ଝିଜୁ ରକମ୍‌ତି ଜାଟି, ଆକାର୍, ରିସା, ଗର୍ବ କିନିକା, ସୁରି, ଗର୍ବ, ମାରି ସାନ୍ତିସିଲିକା ସୁଡ଼ୁଦେଙ୍ଗ ଆଟ୍‌ନା ।

୨୧ ଇଲେଇ ମି ଲାକ୍ଷ୍ମୀ ସନିଝାଲେ ଆୟାଝାଜା ମାପୁରୁ ମି ଆଗଡ଼ି ନାଙ୍ଗ୍ ସେମାର୍ କିନାନ୍, ଏମେକାର୍ ଆଗଡ଼ିରାନ୍ ପାପ କିତାମାନାର୍, ମାତର୍ ଝାରି ତାଗ୍‌ଲ ପାଣିଝିଜୁ, ଲାଲାୟ୍ ମାରି ଦାରିପାଣି ଉଣ୍ଡିଙ୍ଗ ମନ୍‌ବାଦ୍‌ଲେ କିଏର୍, ଇୟାଝାଜା ନାଣ୍ଡଲୋକ୍ ଉଣ୍ଡିଙ୍ଗ ନାଙ୍ଗ୍ ଆଡ଼ିବାଦେଙ୍ଗ ଆନାଡ଼ ।

୧୩

ସାରାସାରି ଜାଗାରତା ନି ନମସ୍କାର

୧ ଇୟାତାନିଙ୍ଗ ମିସାକିଜି ମୁଜା ନାନୁ ମି ଲାକ୍ଷ୍ମୀ ଝାଜିନା । ଦର୍ମସାସ୍ତ୍ରଦି ଇସାବତାନ୍, ରିଏର୍ ସିଲିତିଙ୍ଗ ମୁଏର୍‌ରି ସାକିଦି ପାରମାଣ୍ଡତାନ୍ ଝିଜୁ ମାଟା ପୁରା ଆନାଡ଼ ।

୨ ପୁର୍ବେ ପାପ୍ କିତିମାନି ଲୋକାଙ୍ଗ୍ ମାରି ଆଇ ଓଜେରିଙ୍ଗ୍ ନାନୁ
ରିଜା ଆବେନ୍ ସୋଲ୍ଲସି ଇର୍ହାର୍ ମାରି ଇଲେଇ ଆକମାନିଜି ବା
ଇଜିନା ଯେ, ନାନୁ ଇଲେଇ ସରିଙ୍ଗ୍, ଏନ୍ ଦଣ୍ଡଦାନ୍ ଡିସାଇ ଆଦେଙ୍ଗ୍
ଆର୍ଏର ।

୩ କ୍ରିସ୍ତ ଜେ ନା ମାଣ୍ଡକୁ ସିଜି ଝାର୍ଗିଜିନାନ୍, ଇୟା ବିସୟତାନ୍
ମିର୍ ଅଡ୍‌ବିନିମାନି ଓଜୁ ପାର୍ମାଣ୍ ପୋଇନିଦେର୍ । ମି ଉଣ୍ଡିଙ୍ଗ୍ ଝାନ୍
ଏସାଙ୍ଗ୍‌ବା ଦୁର୍ବଳ ଆଏନ୍ । ମାତର୍ ମି ଲାକ୍‌ତୁ ଝାନ୍ ଝାନି ସାକ୍ତିଦି
ପରିଚୟ ସିତାମାନାନ୍ ।

୪ ଝାନ୍ ଦୁର୍ବଳ ଆଜି କ୍ରିସ୍ତୁ ସାତିଙ୍ଗ୍‌ବା ମାପୁରୁଦି ସାକ୍ତିଦାନ୍
ଇଲେଇ ଜିବନ୍ ମାନାନ୍ । ଝାନିଝାଲେ ମିସାଜି ମାପୁ ବା ସାକ୍ତିସିଲି
ଝାଜା ଆତାମାନାପ୍, ମାତର୍ ମି ଝାଲେ ମା ମିସାନିମାନୁ ମାପୁରୁଦି
ସାକ୍ତିଦି ମିସାଜି କ୍ରିସ୍ତଦି ଝାଲେ ମାଡ୍ ଜିବନ୍ ଆନିକା ।

୫ ମିର୍ ବିସ୍‌ବାସ୍ତୁ ମାନିଦେର୍ ନୋ ସିଲେ, ନିଜେଦି ପରିକା ନି
ବିଚାର୍ କିଜି ସୁଡ୍‌ତୁ । ମି ଜିବନ୍‌ତୁ ଜିସୁ କ୍ରିସ୍ତ ବାସାକିଜିନାନ୍, ଇୟା
ବଲ୍ଲୁ ଇନିକା ନେସିଇଦେର୍ ନୋ, ଇବେନ୍ନୁ ମିର୍ ଅର୍ସେ ଆରାତି
ଆଡିମାନିଦେର୍ ?

୬ ଆସା କିଜିନା, ମିର୍ ବୁଜାଦେଙ୍ଗ୍ ଆର୍ନିଦେର୍ ଜେ, ମାଡୁ
ଆରାଏପ୍ ।

୭ ମିର୍ ଇନି ଅନ୍ୟାୟପାଣିଦୁ ତେବାମାର୍, ଇୟାଉଣ୍ଡିଙ୍ଗ୍ ମାପୁ
ମାପୁରୁଦି ଲାକ୍‌ତୁ ପାର୍ତାନା କିଜିନାପ୍ । ମାପୁ ଜେ ଇବେନ୍ନୁ ପରିକାଦୁ
ଜିଶାତାମାନାପ୍, ଇକା ମାପୁ ତର୍ତେଙ୍ଗ୍ ସଲ୍‌ଏପ୍, ମାତର୍ ମାପୁ
ଆରାତିମାରିଙ୍ଗ୍ ବା ମିର୍ ଏଣ୍ଡେସ୍ ନେଗି ପାଣି କିନିଦେର୍, ଇୟାଉଣ୍ଡିଙ୍ଗ୍
ପାର୍ତାନା କିଜିନାପ୍ ।

୮ ସଡ୍‌ତିଙ୍ଗ୍ ବିରୁଦ୍ କିଦେଙ୍ଗ୍ ମା ଅଦିକାର୍ ସିଲେଡ୍; ମାପୁ କେବଲ
ସଡ୍‌ତି ଉଣ୍ଡିଙ୍ଗ୍ ପାଣି କିଦେଙ୍ଗ୍ ଆର୍ନାପ୍ ।

୯ ମାପୁ ଦୁର୍ବଳ ମାର୍‌ଇଝାଲେ ମିର୍ ସାକ୍ତିମାନିଙ୍ଗ୍ ମାପୁ ଝେଡ୍‌କା ।
ଆୟାଉଣ୍ଡିଙ୍ଗ୍ ମି ନେକ୍‌କାଆନି ଉଣ୍ଡିଙ୍ଗ୍ ମାପୁ ପାର୍ତାନା କିଜିନାପ୍ ।

୧୦ ଆୟାଉଣ୍ଡିଙ୍ଗ୍ ଆକ ମାନ୍‌ଜି ନାନୁ ମି ଲାକ୍‌ତୁ ଇୟା ସିଟି
ରାସ୍‌ସିନା, ଆବେଣାନ୍ ମି ଲାକ୍‌ତୁ ଇଗାଝାନି ବେଡ୍‌ଡାଦୁ ଏଣ୍ଡେସ୍
ଆର୍‌ଝାଦି ଝାଜା ନାଙ୍ଗ୍ ଅଦିକାର୍ କିଦେଙ୍ଗ୍ ପଡାଏଡ୍ । ଇରିଙ୍ଗ୍

ମିଙ୍ଗୁ ରୁକୁତେଙ୍ଗ ସିଲେ, ମାତର୍ ତିଆର୍ କିଦେଙ୍ଗ ମାପୁରୁ ନାଙ୍ଗୁ
ଅଦିକାର୍ ସିତାମାନାନ୍ ।

୧୧ ତଡ଼ାନ୍‌କୁ ନି ତାଙ୍ଗୁ ନା ସାରାସାରି ମାଟା ଇକା ନିଜେଦିଙ୍ଗ
ଟିକ୍ କିଦୁ, ନା ମାଟା ଆସ୍‌ତୁ, ଝିଜେରେ ଉନ୍‌ତ୍ରେମାନୁ ଆଦୁ ମାରି
ସାନ୍ତିଦାନ୍ ତେବାଦୁ । ଜିବନ୍‌ନୋନିକା ମାରି ସାନ୍ତିଦି ମାପୁରୁ ମି ଝାଲେ
ତେବାପିନ୍ ।

୧୨ ପବିତ୍ର ରୁମାଦାନ୍ ନିଜେନିଜେଦିଙ୍ଗ ମାଡ଼ିସ୍ କିଦୁ ।

ଝିଜେରେ ମାପୁରୁଦିଲୋକ୍ ମିଙ୍ଗୁ ମାଡ଼ିସ୍ କିଜିନାର୍ ।

୧୩ ପ୍ରବୁ ଜିସୁ କ୍ରିସ୍‌ତି ଦୟା, ମାପୁରୁଦି ଜିବନ୍‌ନୋନିକା ମାରି
ପବିତ୍ରଆତ୍ମାଦି ସାହାଜ୍ୟ ମି ଝିଜେରି ଝାଲେ ମାନିଡ଼ ।

ମାପୁରୁଦି ସବ୍ ବାକ୍ୟ

The New Testament in the Konda Porja Lanugage of India. Konda-Dora: ମାପୁରୁଦି ସବ୍ ବାକ୍ୟ (Bible)

copyright © 2020 The Word for the World International and Konda Porja
Translation Samithi, Dasamanthpur, Odisha

Language: Konda Porja (Konda-Dora)

Contributor: The Word for the World South Asia

ମାପୁରୁଦି ସବ୍ ବାକ୍ୟ

ପୁନି ନିୟମ, 2020

The New Testament in Konda Porja Language

The Word for the World International

This translation is made available to you under the terms of the Creative
Commons Attribution Share-Alike license 4.0.

You have permission to share and redistribute this Bible translation in
any format and to make reasonable revisions and adaptations of this
translation, provided that:

You include the above copyright and source information.

If you make any changes to the text, you must indicate that you did so in
a way that makes it clear that the original licensor is not necessarily
endorsing your changes.

If you redistribute this text, you must distribute your contributions
under the same license as the original.

Pictures included with Scriptures and other documents on this site are
licensed just for use with those Scriptures and documents. For other uses,
please contact the respective copyright owners.

Note that in addition to the rules above, revising and adapting God's Word
involves a great responsibility to be true to God's Word. See Revelation
22:18-19.

2025-05-07

PDF generated using Haiola and XeLaTeX on 6 May 2025 from source files
dated 7 May 2025

506ae627-08e2-556a-b39e-5315f886d95a